

ЎЗБЕКИСТОН ССР ФАНЛАР АКАДЕМИЯСИ  
Х. С. СУЛАЙМОНОВ НОМИДАГИ  
ҚҰЛЕЗМАЛАР ИНСТИТУТИ

ШАРҚ КЛАССИКЛАРИ МЕРОСИДАН

**УМАР ХАЙЁМ**  
**РУБОЙЛАР**

Халқаро Фирдавсий мукофоти лауреати  
Шоислом Шомуҳамедов таржимаси

Ўзбекистон КП Марказий Комитетининг нашриёти  
Тошкент — 1981

**Редакция:** Абдураҳмонов Ф. А., Аҳмадхўжаев Э. Т., Жабборов Ж. Ж., Қаюмов А. П., Пармузин Б. С., Шоғуломов И. Ш., Шомуҳамедов Ш. М.

*Кўлингиздаги ушбу китобчада жаҳонга машҳур бўлган форс-тожик классик шоири, математик олими, астрономи ва файласуфи Умар Хайёмининг (1048—1123) танлаб олинган энг яхши рубоиллари берилган.*

*Иккинчи тўлдирилган нашри.*

Муҳаррир Жуманиёз Жабборов

©Издательство ЦК Компартии Узбекистана, 1981.

## ЖАҲОННИ ЗАБТ ЭТГАН ШЕЪРИЯТ

Хайём ҳақида ўйлар эканмиз, кўз ўнгимизда икки буюк сиймо гавдаланади. Бири — Ўрта асрнинг буюк риёзиётчи, файласуф ва мунаҗжим олими, иккинчиси эса, XIX—XX асрдан бошлаб жаҳон шеърияти классиклари қаторидан шарафли ўрин әгаллаган, бизнинг кунларда ҳам шеърият осмонининг ёрқин юлдузларидан бири, забардаст шоир.

Хўш, бунга сабаб нима?

Умар Хайём 1048 йилда туғилиб Нишопурда. Балх, Бухоро, Самарқанд ва бошқа шаҳарларда ўқиб улгаяди ва ўз замонасининг баркамол олимларидан бўлиб етишади. Ривоятларга қараганда, салжуқийларнинг улуг вазири Низомулмулк унга Нишопур ҳокимлигини таклиф этади. Аммо Хайём бунга: «Мен одамлар устидан ҳукмронлик қилолмайман» деган мазмунда жавоб беради. Хайёмнинг бир рубоийси ҳам шу мазмунда:

Кимники бор эса бир бурда иони,  
Ўзига яраша ўй-ошиёни,  
На бирор унга қул, на у бирорвга,  
Айт, шод яшайверсин, хушдир замони.

Ниҳоят Хайём Исфаҳон расадхонасига бошчилик қилишга рози бўлади. У 1074 йилдан бошлаб бу расадхона ишларига раҳбарлик қилиб математика ва астрономия соҳасида катта илмий тадқиқотлар олиб боради.

Унинг математика, астрономия ва фалсафага оид бир қитоблари бизгача етиб келган.

Олимнинг бу илмлар соҳасида қилган қатор қаш-  
фиётлари фан тарихида катта роль ўйнаган.

Масалан, 1077 йилда у юонон олими Эвклид кито-  
бидан бир неча геометрик шаклларни шархлаб ёзган  
асарида, бутун сонларнинг илдизини топиш йўллари-  
ни кўрсатиб берган.

Хайём бир неча асарида улуг олим Абу Али ибн  
Сино фикрларини тарғиб этади. Унинг бир қатор қи-  
тобларини арабчадан форс тилига таржима қиласди ва  
шархлаб беради. Хайём ўзининг «Рисолат-ул-кавн ва  
т-таклиф» («Коинот ва унинг вазифалари») номли  
китобида Абу Али ибн Синони ўзининг устози деб  
билади. Хайём бундан ташқари «Рисола фи-л-вужуд»  
(**«Борлиқ ҳақида рисола»**), «Рисола фи куллиёти  
вужуд» (**«Борлиқ умумийлиги ҳақида рисола»**) каби  
бир неча фалсафий асалар ёзадиким, унда автор  
Ибн Синонинг содиқ шогирди сифатида унинг фикр-  
ларини давом эттиради.

Дунё фалсафаси билан шуғулланиш, мавжудотнинг  
сирини излаш билан бирга, Хайём бир қанча олим-  
ларга раҳбарлик қилиб, беш йил қаттиқ текшириш-  
лар олиб боргандан кейин 1079 йилда янги ислоҳ қи-  
линган календарь таклиф қилган. Бу календарь Евро-  
пода ундан беш юз йил кейинроқ қабул қилинган ва  
ҳозирги кунгача амалда қўлланилаётган Григориан  
календаридан ҳам аниқроқ бўлган.

Хайём ҳаётига тааллукли бир ҳикоятда Хайём об-  
рази зўр олим, шу билан бирга, турли ҳаётий воқеа-  
ларга жуда ҳозиржавоб шоиртабиат киши сифатида  
чизилади. Ҳикоя қилинишича, бир куни Хайём З—4  
улфати билан боғда май ичиб ўтирган экан, тўсатдан  
турган шамол май солинган кўзани ағдариб юбориб-  
ди, шунда Хайём худога қараб:

Кўзами синдириб, иргитдинг, тангри,  
Хуррамлик эшигин беркитдинг, тангри.  
Тупроққа тўқдингкү гулгун майимни,  
Билмадим маstmисан, на ётдинг, тангри!

дебди. Бу сўзлардан ғазабланган тангри Хайёмнинг юзини қорайтириб қўйган эмиш. Ўртоқларидан буни эшитган шоир дарҳол иккинчи бир рубоийни ўқибди:

Ахир, бу оламда бегуноҳ ким бор?!  
Нечук яшай олди бўлмай гуноҳкор?!  
Ёмонлик қайтарсанг ёмонлигимга,  
Фарқимиз не бўлдӣ, айт, парвардигор!

Бу сўзларни эшитиб, ўз қилмишидан уялган тангри унинг юзини аслига қайтарган эмиш...

Хайём ҳаётининг охирги йиллари айниқса оғир бўлган, у Нишопурга қайтиб келиб, фақирликда умр кечирган бўлса-да, илмий ишларини давом эттирган. Улуғ олим бу даврда ҳам математика, астрономия ва фалсафадан бир қанча асарлар ёзади. Ундан ташқари ўз атрофига содиқ шогирдлар йиғиб, лекциялар ўқиди, бир гуруҳ олимларни тарбиялаб етиширади.

Ажойиб илмий асарлар ёзиб қолдирган буюк олим 1123 йилда Нишопурда вафот этади. Аммо Умар Хайём ўзининг жаҳоншумул илмий асарлари билан эмас, нодир поэтик асарлари — рубоиёти билан оламга машҳур бўлди.

У ўз рубоийларида ҳам илмий-фалсафий китобларида бўлганидек олам сирлари, ҳаёт ҳақиқатини излайди, бу борадаги фикру ўйларини ажойиб шеърий образларга ўраб, мўъжизакор тўртликларда ифодалаб беради.

Тўртгина мисра шеърга забардаст фалсафий фикрларни сигдира олишига қарамай, Хайёмнинг услуби — дохиёна содда, ўхшатишлари ниҳоятда табиий, ҳаммага осонгина етиб борадиган услуб. Шунинг учун ҳам унинг оҳангдор шеърлари жаҳон адабиётининг бой хазинасида энг яхши гавҳар доналаридандир.

Унинг рубоийлари деярли ҳамма жаҳон халқлари тилларига таржима қилинган ва қилинмоқда. Бундан ташқари жуда кўп сўз санъаткорлари Хайём рубоийларини ўз асарларига киритадилар, минглаб кишилар бу рубоийларни ёддан ўқиб юрадилар, Хайём китоб-

ларини бир-бирларига совға қиласылар. Мана, яна бир мисол: 1942 йил Ленинград қамалининг энг даҳшатли ва оғир кунлари. Революция бешигининг ҳимоячилари орасида тўрт мисрадангина иборат бўлган ажойиб шеърлар қоғоздан-қоғозга, оғиздан-оғизга ўта бошлади.

Бу тўп садолариdek, бир нафас билан ўқиладиган қисқа, аммо вазмин шеърлар юракда чуқур из қолдипар, кишиларни оғир курашлардан иборат бўлса-да инсонга энг маҳбуб нарсани — мана шу реал ҳаётни севишга, керак бўлса шу ғоя учун ўлимга тик боришга чорлар эди.

Бу тўртликларни ленинградлик марҳум шоир Сергей Хмельницкий Хайём рубоийларидан таржима қилиб келар, жангиларга ўқиб берар эди. Шундай қилиб, Ленинград мудофаачилари сафида Умар Хайём ҳам бор эди.

Шуниси қизиқарники, буюк кашифётчи олим Умар Хайём ҳеч вақт шоирликни ўзига касб қилиб олмаган, рубоийларни эса ўзи кўнгил таскини учун ёзган ва ҳеч кимга ўқиб ҳам бермаган. Унинг рубоийлари турли илмий китоблари ҳошиясига битилган ёки ён дафтаридан топилган. XIX асрнинг иккинчи ярмигача уни жаҳон классиклари қаторига киритмаган ҳам эдилар. Фақат XIX асрнинг иккинчи ярмидагина инглиз шоири Геральд Фицжеральд унинг рубоийларидан бир қисмини эркин таржима қилиб, нашр эттиради. Бу кичкинагина китобча чиқиши биланоқ, рубоийлардаги фалсафий теранлик ва ҳаётйлик гарб ва шарқ китобхонлари дилини овлади.

Хайём ҳақида мактуб ёзган китобхонлар кўпинча унинг шеърларида тез-тез тилга олинадиган май, шароб сўзларига изоҳ беришни илтимос қиласылар. Баъзилар ҳатто: «Хайём майпараст бўлганми?» деган савонни ўттага ташлайдилар.

Бу ҳақда шуни айтиб ўтмоқ жонизdirki, Умар Хай-

ём рубоийларидаги май—бадиий образ бўлиб, уни жўнгина ва айнан тушуниш тўғри бўлмайди.

Масалан, Хайём май образи орқали гоҳо кишилар портретини чизиб:

Ичкилик кеккайган бошни қилур ҳам,  
Майдан ечилмаган бирор тугун кам.  
Бир қултум май ичган бўлсайди шайтон,  
Минг сажда қиларди одамга ул ҳам.

деса, гоҳо худбинликни фош қиласди:

Май ичамен, мастлик қилмаймен асло,  
Қадаҳдан ўзгага бўлмаймен бало.  
Бода ичишликтан менинг ғаразим —  
Ўзимга сен каби қўймаслик бино.

Кўпчилик рубоийларида мутафаккир олим фалсафий фикрларини баён қилиш учун май образидан моҳирона фойдаланади. Масалан, материянинг абадийлиги, унинг бир ҳолатдан иккинчи ҳолатга ўтиб юришилигини, ўлик ва тирик табиат орасида ўтиб бўлмас чегаранинг йўқлигини эътироф қиласр экан дейди:

Тур, гўзал, очилсин баҳри дилимиз,  
Жамолинг ҳал қисин ҳар мушкилимиз.  
Тупроғимиз кўза бўлмасдан бурун,  
Бир кўза ичайлик, жўйсин дилимиз.

Бу мисраларда юқоридаги фикр май ва кўза образлари тимсолида катта маҳорат билан баён этилган.

Хайём рубоийларидаги май образига турли ва мураккаб вазифалар юклanganлигини қўйидаги мисол ҳам яққол кўрсата олади:

Ҳаётга ўзга тус бергувчи шароб  
Келтир, қадаҳга қуй бўлса ҳам азоб.  
Қўлга бер, оламнинг ишлари хуноб,  
Ҳар нафас умр ўтар, айлагил шитоб.

Бу рубоийда шоир май образи орқали ўз замонидаги қийин-қистовли ҳаётга «ўзга тус бериш», яъни уни

ўзгартириш масаласини қўймоқда.

Алишер Навоий ҳам май образининг ишоралари, маънолари кўп эканлигини таъкидлаб, ўзининг форсча газалларидан бирида:

Румузи нашъни май, эй ки дар намеёби,  
Кунун, ки жоми майт медиҳам ба каф, дарёб.

(яъни, эй май нашъасининг ишорат ва рамзларини топа олмаган одам, энди бир пиёла майни қўлинга берай, унинг рамз ва ишораларини топгил) дейди.

Хайём бадиий ижоди шуҳратининг сири нимада?

Бунинг сири уларда шоир киши қалбини, унинг на зокатини, киши руҳий кечинмалари, орзу-ўйлари, кайфиятларини, ҳаёт мантиқини, инсон қалби билан реал ҳаёт орасидаги муносабатни ажойиб образларда жуда ёрқин тасвирлаб бера билганидадир. Шунинг учун ҳам унинг ижоди умумбашарият бадииёт boginining сўлмас чечакларидан бири бўлиб қолди.

Инсонларни дўстлик ва иттифоқликка чақирган мутафаккир:

Дўстлар, иноқликни қилсангиз бунёд,  
Тез-тез дийдор кўриб, ўзни айланг шод,  
Соқий тоза майни сузганда, айланг  
Мен бечорани ҳам дуо бирла ёд.

деган әди. Миллионлаб кишилар уни севиб ўқимоқдалар. Унинг шеърияти бутун жаҳонни ўз тасарруфига олган.

Шоислом Шомуҳамедов,  
филология фанлари доктори

**1**

Дунёнинг тилаги, самари ҳам биз,  
Ақл кўзин қораси — жавҳари ҳам биз.  
Тўтарак жаҳонни узук деб билсак,  
Шаксиз унинг кўзи — гавҳари ҳам биз.

**2**

Тақдир лавҳасида ҳукмим бўлғонда,  
Майлимча ёзардим уни шу онда.  
Қайғуни дунёдан йўқотиб буткул,  
Шодликдан бўларди бошим осмонда.

### 3

Азал сиррин билолмасмиз на сену, на мен,  
Бу жумбоқ, ҳал қилолмасмиз на сену, на мен.  
Парда орқасидандир бу ғувуримиз,  
Парда кетару қолмасмиз на сену, на мен.

### 4

Десалар майпарааст, худди ўша мен,  
Десалар фосиқ, маст, худди ўша мен.  
Сиртимга бунчалар қарама, дилим —  
Бўлса тоза ё паст, худди ўша мен.

### 5

Дерлар: жаннатда ҳур, кавсар бўлармиш,  
Ариқ тўла май, сут, шакар бўлармиш,  
Қадаҳни тўлдириб, қўлгинамга бер,  
Минг насядан бир нақд хуштар бўлармиш,

### 6

Ен берма, бу дунё аслида бедод,  
Утганлар ғамин ҳам қилма менга ёд.  
Кўнгил берма гажак сочдан бўлакка,  
Майсиз бўлма, умринг айлама барбод.

7

Улик-тирик ишин тузаткувчисен,  
Тарқоқ коинотни кузаткувчисен.  
Ёмон бўлсам ҳамки, сенинг бандангман,  
Мен нима ҳам қилай? Яраткувчи — Сен.

8

Улким, бош косасин бино қилибдур,  
Косагар санъатин пайдо қилибдур.  
Бош косасин вужуд дастурхонига  
Тўнтариб, лиқ тўла савдо қилибдур.

9

Умринг қачонгача ўзим деб ўтар,  
Иўқлик-борлик аро кезим деб ўтар.  
Ишиб қол, ғам бўлгач умринг пайида  
Уйқу ё мастиликда бир зумдек ўтар.

10

Кечаги кунингни айламагил ёд,  
Эртанг келмай туриб, этма қўп фарёд.  
Ўтган, келмаганга қайтурмоқни қўй,  
Қувноқ бўл, умрингни қилмагил барбод.

**11**

Дерлар: жаннатда ҳур бўлмоғи яхши,  
Менга узум сувни булоги яхши.  
Чунки насясидан нақдроги яхши,  
Ногора товушин узоги яхши.

**12**

Азалда лойимни қорганда худо,  
Биларди феълимдан не бўлур пайдо.  
Ҳукмидан ташқари эмас гуноҳим,  
Хўш, нечун маҳшарда беради жазо?!

**13**

Сен — мендан олдин ҳам тун-кун бор эди,  
Айланган фалак ҳам бутун бор эди.  
Тупроққа авайлаб қадамингни қўй,  
Бу тупроқ қора кўз бир нигор эди.

**14**

Жонимиз бу тани тарқ этиб кетар,  
Икки ғишт гўримиз қўзин беркитар.  
Кейин бошқа гўрга ғишт қўймоқ учун,  
Бизнинг тупроқларни эзиб лой этар.

15

Ичганда, ақлдан бегона бўлма,  
Эс жўйиб, жаҳлга сен хона бўлма.  
Истасанг қизил май ҳалол бўлишин,  
Хеч кимни ранжитма, девона бўлма.

16

Бизлар қўғирчоғу, фалак қўрчоқбоз,  
Бу сўзим чин сўздир, эмасдир мажоз.  
Йўқлик сандуғига бир-бир тушамиз,  
Вужуд палосида ўйнагач бир оз.

17

Ҳар сирни дилида сақласа доно,  
У яширин бўлсин мисоли анқо.  
Садафнинг ичида қатра дур бўлур —  
Сир қилиб қалбida яшургач дарё.

18

Мени файласуф деб, ёв қилур хато,  
Мен ундай эмасман, билади худо.  
Шу қайғу уйига келгач, ўзимни —  
Ким билсан ўшандан камроқман, ҳатто.

**19**

Бу кўза мен каби ошиқ зор эди,  
 Севгани қаро соч бир нигор эди.  
 Кўза бўйнидаги даста бир маҳал —  
 Қўл эди, ёр қучиб бахтиёр эди.

**20**

Ёраб, лойимни-ку, қорган ўзингсан,  
 Уриш — арқогимни ўрган ўзингсан.  
 Ёмонманми, яхши, мен қандоқ қилай!  
 Тақдир манглайнин берган ўзингсан.

**21**

Тангри, ўзинг шундай яратдинг мени,  
 Маю чолғувчига қаратдинг мени.  
 Азалда шу хилда яратиб қўйиб,  
 Нечун дўзахингга қулатдинг мени?!

**22**

Каъбаю бутхона қуллик хонаси,  
 Бутхона занги ҳам шум таронаси.  
 Мехробу калисо, тасбеху салиб —  
 Барчаси қулликнинг бир нишонаси.

**23**

Фалакка ҳукм этган тангридай бўлсам,  
Фалакни қиласардим ўртадан барҳам.  
Янгидан шундай бир фалак тузардим,  
Яхшилар тилакка етарди ул дам.

**24**

Кулол дўконига кирдим бир сафар,  
Дастгоҳда ишларди уста кўзагар,  
Гадо қўлидану шоҳнинг бошидан  
Кўзанинг бўйни-ю дастасин ясар.

**25**

Масжидга кетгандим бир ниёз учун,  
Рост айтсан, ўйлама, ҳеч намоз учун.  
Жойнамоз ўғирлаб эдим, эскибди,  
Яна аста келдим жойнамоз учун.

**26**

Муфти, сендан кўра пуркорроқдирмиз,  
Ута маст бўлсак ҳам ҳушёрроқдирмиз.  
Биз ток қонин ичамиз, сен одам қонин,  
Инсоф қил, қайсимиз хункорроқдирмиз.

27

Бизлар бўлмасак ҳам жаҳон бўлғуси,  
Бизлардан на ному нишон бўлғуси,  
Аввал-ку йўқ эдик, етмовди халал,  
Яна бўлмасак ҳам, ҳамон бўлғуси.

28

Мен келдиму, дунё кўрдими фойда!  
Кетсам, мартабаси ошарми? Қайда?  
Ҳеч ким тушунтириб бера олмади:  
Келишим — кетишим сабаби қайда.

29

Дўзаху жаннатни ким кўрган, э дил,  
У дунё хабарин ким берган, э дил.  
Қўрқув умидимиз шулардан, аммо —  
Ному нишонасин ким билган, э дил.

30

Сабодан бўлибди гул ёқаси чок.  
Гул юзидан булбул бўлмиш тарабнок.  
Гул тагида ўтири, чунки жуда тез  
Гул ерга тўкилур, биз бўлурмиз хок.

31

Бу ернинг юзида ҳар зарраки бор,  
Бир замон бўлмишди ой юзли дилдор.  
Нозанинлар юзин гардин аста арт,  
Гўзал чеҳра эди бир вақт бу губор.

32

Ҳушёр бўлсам, мендан хурсандлик йироқ,  
Маст бўлсам, ақлимдан ажрайман бироқ.  
Мастлигу ҳушёрлик оралиги бор,  
Ҳаёт шу, унга қул бўлсам яхшироқ.

33

Бир ботмон бодани бир жомга солсам,  
Икки жом май билан бой бўла қолсам.  
Аввал ақлу диним қилиб уч талоқ,  
Сўнгра ток қизига ўйланиб олсам.

34

Шундай ичайинки, ўлсам ул шароб —  
Ҳиди мозоримдан чиқсин бурқираб  
Хумори ўтарса қабрим бошидан  
Иси элитсину айласин хароб.

35

Дунёда улуғ сўз — қуръон ўқилур,  
У ҳам мудом эмас, аҳёи ўқилур.  
Пиёла четида бир оят борки,  
Ҳар жойда, ҳамиша, ҳамон ўқилур.

36

Қўлимда ҳар маҳал қадаҳ туттаман,  
Минбару дафтарнинг баҳрин ўттаман.  
Мен-ку бир ҳўл фосиқ, сен қуруқ зоҳид,  
Ҳўл — ёнмас, на кўриб, на эшиттаман.

37

Мен ўлсам, май бирла ювишни кўзланг,  
Иўқловда жом бирла шаробдан сўзланг,  
Қиёмат кунида тоғмоқ бўлсангиз,  
Майхона тупроғин тубдан изланг.

38

Мастни таъна қилма, ичмасанг соғар,  
Ғийбат — достон қилма, бўлма ҳийлагар.  
Кеккай кўрма ҳеч май ичмайман, деб  
Сенинг қилмишларинг бундан бешбаттар.

**39**

Шайх фоҳишага дер: Нима бу ишинг,  
 Маст бўлиб, қўлма-қўл қўниб юришинг?!  
 У дер: Мен шундаймен, аммо сен айт-чи,  
 Сиртинг кўрсатгандай покми қилмишинг?!

**40**

Э чарх, иоказларни қилдинг фаровон —  
 Ҳаммому уй бердинг, ер, сув, тегирмон,  
 Тўғри киши гаров бир бурда ионга,  
 Жирттакка арзимас бундайин даврон.

**41**

Бу саройда Баҳром ичар эди жом,  
 Энди кийик, тулки олади ором.  
 Бир умр қулонлар овлар эди у,  
 Үлимга қулондай овланди Баҳром.

**42**

Жаннатда ҳам ҳуру ҳам май бўлармиш,  
 Ҳаммаси мўл-кўлу нўмай бўлармиш,  
 Биз маю машъшуқни севсак арзайди,  
 Чунки оқибат ҳам шундай бўлармиш.

## 43

Бизга фалак иши — фақат ташвиш-ғам,  
Биринни тикласа, бошқаси барҳам,  
Ҳали келмаганлар бундан бехабар,  
Хабар топа қолса келмас эди ҳам.

## 44

Маст булбул йўл олди гулистан томон,  
Ўнда топди бода ҳам гули хандон.  
Юрак тили билан шивирлаб айтди:  
«Бўш қўйма», ўтган умр қайтмас ҳеч қачон!»

## 45

Хуррамлик китобин ўқимоқ керак,  
Дилда ғам кўкати ўсмасин андак.  
Май ичиб, истагинг ўринлат доим,  
Маълумки, тез келур ўлимдан дарак.

## 46

Билоғонлар бор-ди ўхшаш офтобга,  
Ҳар бири хазина илму одобга.  
Бу қоронғи тундан йўл топишолмай,  
Бирор афсонадеб кетдилар хобга.

**47**

Мастлар дўзахийдир, деб айтсалар, сиз  
Бу хилоф сўзларга кўнгил бермангиз,  
Ошиқлару, мастлар дўзахга тушса,  
Жаннат кафтдек тақир қолғуси сўзсис.

**48**

Билмадим, қорилган чоғида лойим,  
Жаннатми, дўзахдан аталган жойим.  
Менга нақд бўлса бас ёр, чолғу, шароб,  
Нася жаннат сенга бўлсин ҳар дойим.

**49**

Май ичиб қувонмоқ оиним менинг,  
Куфру дин бимаслик соф диним менинг.  
Дунё келиннидан қалинин сўрдим,  
Деди: шод дилингдир, қалиним менинг,

**50**

Май ич мангуд ҳаёт, ҳайҳот, мана шу,  
Ёшликнинг даврони, эй зот, мана шу,  
Гул фаслида маю маст улфат билан  
Бир дам ўйса, асли, ҳаёт мана шу!

**21 —**

**51**

Табиат тартибин яратиб оллоҳ,  
Нечун чил-чил қилиб отади, э воҳ,  
Яхши бўлса нега парчалар уни  
Ёмон бўлганида айт, кимда гуноҳ?!

**52**

Лола юзин ювди ёғингар кўклам,  
Лиммо-лим қадаҳга қўл узат бардам.  
Буқун сен сайр этган ушбу кўкатлар  
Эрта тупроғингдан унар жамулжам.

**53**

Дилим илмлардан маҳрум бўлмабди.  
Бир сир қолмадикни мафхум бўлмабди.  
Туну кун ўйладим етмиш икки йил.  
Онгладим — ҳеч нарса маълум бўлмабди.

**54**

Тўнкарилган жомдай қўринар осмон,  
Остида забундур кимки билагон.  
Шиша-ю қадаҳнинг дўстлигини кўр,  
ЛАб қўйиб ўлишар, ўрталикда қон.

55

Шод бўлмоқ истасанг элдан тама уз,  
Давр яхшими, ёмон — иноқликни буз.  
Қадаҳу ёр сочи бўлсин қўлингда,  
Утар бу давриниг ҳам бу кеча-кундуз.

56

Бир қўлда қуръону биттасида жом,  
Баъзида ҳалолмиз, баъзида ҳаром.  
Фируза гумбазли осмон тагида  
На чин мусулмонмиз, на кофир тамом.

57

Зуҳра, ой осмонга чиққан кезданоқ  
Майдан соз нарсани ким кўрган... бироқ —  
Ҳайронман майфуруш бодани сотиб,  
Пулга нима олур ундан яхшироқ.

58

Бир кекса маст эрди, уйқуда эрди,  
Эс-ҳушин шилириб шамолга берди.  
Май ичиб, маст бўлиб, ухлаб гангираб,  
«Валлоҳу латифун биибодиҳ» дерди.

**59**

Мұхтожлик қўйида қўнгилни овла,  
 Юракка яқину маъқулни овла.  
 Бир дилча турмас юз лойхона Каъба,  
 Каъбада нима бор, бир дилни овла.

**60**

Жаҳонда ғам ема, қўлингдан келса,  
 Яхшимас бор-йўқдан дил дардга тўлса,  
 Беш қунлик дунёда шодлик-ла еб-ич,  
 Бир дон элтолмассан хазинанг бўлса.

**61**

Хўрагимни май-ла тўқис — бут қилинг,  
 Қаҳрабо юзимни нақ ёқут қилинг.  
 Жаҳондан кўз юмсан, шаробга ювиб,  
 Ток зангидан менга бир тобут қилинг.

**62**

Ичиб қол, тупроғинг тўзон бўлғуси,  
 Лойингдан шиёла — жонон бўлғуси,  
 Жаннату дўзахни ўйлаб ўтирма,  
 Оқил бунга асир, қачон бўлғуси.

63

Сенинг мафтуниингман берайин хабар,  
Уни икки сўзла этай муҳтасар:  
Ишқинг тупроқ қилгай, аммо меҳрингдан  
Бошимни кўтариб, бўлгум жилвагар.

64

Афсус ёруғ умрим — қаро тун бўлди.  
Ажал дастидан кўп жигар хун бўлди.  
У дунёдан келиб, айтмади ҳеч ким:  
Кетганилар бошида қандай кун бўлди.

65

Ҳар ким ақл сўзига соларкан қулоқ,  
Чиндан, оқибатда бу ҳўқиз соғмоқ!..  
Ғўр ақлинг зўр келиб май сотмаяпсан,  
Аблаҳлик тўнини кий, шу маъқулроқ!

66

Кекса, ёш — ҳаётга ҳар кимки етар —  
Ҳаммаси изма-из бирма-бир ўтар.  
Бу дунё ҳеч кимга қолмас абадий,  
Кетдилар, кетамиз, келишар, кетар.

**67**

Дилим бўлган эди битта ёрга зор,  
 У ўзга бир ерда ғамга гирифтор.  
 Мен ундан ўзимга дору изласам.  
 Нетай, табибимнинг ўзи ҳам бемор.

**68**

Юрагим қонидан юз хона вайрон,  
 Уввос тортувимдан қўрқинч юз чандон,  
 Ҳар бир кишрингимда қон дарёси бор,  
 Киприклар юмилса бошланур тўфон.

**69**

Киши ўзлигидан яхши, ёмон ҳам,  
 Қазову қадару қувонч ёки ғам.  
 Ақл айтур буларни чархга тўнкама,  
 Чарх сендан ожизроқ бечора-ю, кам.

**70**

Истагим майи ноб бўлгани — бўлган,  
 Тинглаганим рубоб бўлгани — бўлган,  
 Менинг тупроғимдан кўза қилсалар,  
 У ҳам тўла шароб бўлгани — бўлган.

— 26 —

71

Гул дер: Мен Юсуфмен Миср — чаманда.  
Еқутдан қимматроқ зар тұла ханда.  
Дедим: Юсуф бұлсанғ, күрсат нишона,  
Деди: Бок, қонлидир күйлагим танда.

72

Тур, гүзал, очилсин баҳри-дилимиз,  
Жамолинг ҳал қиласин ҳар мушкулимиз.  
Тупротимиз күза бұлмасдан бурун.  
Бир күза ичайлик, жүйесин күнглиминз.

73

Тонгла ухдасидан чиқолмас киши,  
Не җожат савдоли дилинг ташвиши!  
Ойдинда май ичгин, эй, ой, биздан сүнг  
Ой бизни тополмас, кәзінб ёз-киши.

74

Бизга гул тегмаса, тикан — хор ҳам бас,  
Нур етмаса, олов-гулхан — нор ҳам бас.  
Жанда тұн, ханоқоқ ё шайх бұлмаса,  
Құнғироғу черков ва зуннор ҳам бас.

**75**

Май ичсанг, ўзингдан бехабар қилур.  
Ёвингни ер билан баробар қилур,  
Ҳушёрлик фойдасиз, оқибат ғами  
Дилни ўртай-ўртай яралар қилур.

**76**

Ҳар қанча бўлса ҳам юзгинам гўзал,  
Қоматим сарв каби тикка, мукаммал,  
Тушуна олмадим, нега бунчалик  
Оро берган экан наққоши азал.

**77**

Афсуски йигитлик мавсуми битда,  
Кўклам ўтиб кетди, қиши келиб етди.  
Ёшлик деб аталган у севинч қуши  
Билмадим, қачонлар келди-ю кетди.

**78**

Кимнингки бор эса бир бурда иони,  
Ўзига яраша уй-ошиёни,  
На бирров унга қул, на у бирровга.  
Айт, шод яшайверсин, хушдир замони.

— 28 —

79

Ичкилик кеккайган бошни қилур ҳам,  
Майдан ечилмаган бирор тугун кам.  
Бир қултум май ичган бўлсайди шайтон  
Минг сажда қиласарди одамга ул ҳам.

80

Ҳум тувоги Жамшид давлатидан соз,  
Қултум май Марямнинг овқатидан соз.  
Мастларнинг тоңготар чеккан оҳлари  
Бусайд, Адҳамнинг ниятидан соз.

81

Бу кўп эски равот, олам унга ном,—  
Тун-кун тулпорига бор бунда ором.  
Бу эски базм юзлаб Жамшиддан қолди,  
Бу гўрда ётади юз-юзлаб Баҳром.

82

Келиб — кетмоқдамиз — қани наф — мазмун,  
Вужудимиз ўриш — арқоқсиз бутун.  
Қанча пок дилларни фалак оташи —  
Куйдириб, қул қилур, лек қайда тутун?!

83

Ситамгар, ўткинчи даврондан қўрқма,  
Кўргилик ўтади, жаҳондан, қўрқма.  
Ғам чекма, нақд умринг ишратда ўтказ,  
Нақ шундоқ келажак замондан қўрқма.

84

Шодлик истама, қўй, умринг бир дамдир,  
Тупроқда ҳар зарра Кайқубод, Жамдир.  
Жаҳону борлиқнинг иши бирйўла —  
Үйқудир, хаёлдир, ҳийладир, ғамдир.

85

Эй дўст, халос бўлайлик эрталик ғамдан,  
Нақд деб баҳра олайлик ғанимат дамдан.  
Етмиш минг йилгилар билан тенгмизда —  
Эртага кетсак бу кўҳна оламдан.

86

Иўқлиқдан пок келиб, нопок бўлдик биз,  
Шўху қувноқ келиб, ғамнок бўлдик биз.  
Кўзимиз тўла ёш, юракда олов,  
Умр елга кетди ҳам хок бўлдик биз.

87

Дедим: Энди майи гулгун ичмайман,  
Май — ток қони, энди мен хун ичмайман,  
Кекса ақлым айтди: Шу гапинг ростми?  
Дедим: Ҳазиллашдим, нечун ичмайман?!

88

Дунёга келибмен, бўлдим доим маст,  
Қадр кечаси ҳам мен маству аласт.  
Лабим жом лабида, қучоғимда хум,  
Тонг отгунча қўлим кўзага пайваст.

89

Кўза-ю косангни кўтар, эй дилдор,  
Кўкалам сув бўйи, салқин жойга бор.  
Бу чарх кўп сарв қад, ой юзлиларни  
Гоҳ кўза, гоҳ коса қилмиш неча бор.

90

Май балқиган ёқут, кўзаси кондур,  
Қадаҳи бадану шароби жондур.  
Биллурин бу қадаҳ майдан хандондур,  
Кўз ёшдир, дил қони унда пинҳондур.

**91**

Тоғам бошимизга солгунча ғавғо,  
 Айтгил, май берсингилар бизга бебаҳо,  
 Олтин эмассан-ку, билиб қўй, нодон,  
 Кўмгач қайта кавлаб олмаслар асло.

**92**

Баҳор айёмида гўзал паризод —  
 Бир коса май бериб, дилим этса шод,  
 Кишилар наздида хунук бўлса ҳам,  
 Ит бўлай, жаннатни бир бор қиласам ёд.

**93**

Мастона йўл олдим майхона томон,  
 Кўза қучган масти чол бўлди намоён.  
 Дедим: Уялмайсан худодан нечун!  
 Ул деди: Ичавер, худо меҳрибон.

**94**

Май ичамен, мастилик қилмайман асло,  
 Қадаҳдан ўзгага бўлмайман бало.  
 Бода ичишлиқдан менинг гаразим —  
 Ўзимга сен каби қўймаслик бино.

95

Шўрлик умримизга чарх сиртмоқ — камар,  
Жайхун кўзимизнинг ёшидан асар,  
Беҳуда ранжимиз дўзах учқуни,  
Жаннат — умримизда тинч бир дам магар.

96

Тонг чогида тургил, нозанин гўзал,  
Майдалаб ичайлик, рубобингни чал,  
Дунёда бор одам узоқ турмайди,  
Кетганлари қайтиб келмас ҳеч маҳал.

97

Нечун, биласанми, хўроз ҳар саҳар  
Туриб, мотамзада оҳ-нола қиласар.  
У бизга дейдики: «Тонг ойнасида  
Умрингдан тун ўтди, ўзинг бехабар!»

98

Май ичсанг, оқилу доно билан ич,  
Ёки бир гул юзли зебо билан ич.  
Оз-оз ич, гоҳ-гоҳ ич, ҳам яширин ич,  
Эзма, расво бўлма, ҳаё билан ич.

**99**

Осмонда бир ҳўқиз иомимиш Парвин,  
Бириси қўйида кўтарар замин.  
Кўзингни катта оч, қўш ҳўқиз аро  
Кўриб қўй қанчалаб эшак юрганин.

**100**

На иссиқ, на совуқ, чиройли баҳор  
Булут гул юзидан ювади ғубор.  
Сариқ гулга булбул юрак тилидан  
Фарёд қилиб дейди: «Май ичмоқ даркор!

**101**

Ишқидир агадийлик авжиди офтоб,  
Ҳаёт чаманида толедан хитоб,  
Булбул каби нола қилмоқ ишқ эмас.  
Ишқ — нола қилмаслик бўлсанг юз хароб.

**102**

Э май, сен маъшуқа, мен сенга шайдо,  
Ичаман, қўрқмайман бўлишдан расво.  
Майни шундай ички кўрганилар десин:  
— Э май хуми, қайдан бўлмишсан пайдо?

**103**

Бир гарид кўнглини қила олсанг шод —  
Яхшидир ер юзин қилгандан обод —  
Лутфинг-ла бир дилни қўл қила олсанг,  
Афзалдир юз қулни қилмоқдан озод.

**104**

Тупроқни топтайди нодон, оёғи,  
Билмаски, бу жонон юзин тупроғи,  
Сарой кунгирасин безаган ҳар гишт —  
Султон калласи ё вазир бармоғи.

**105**

Бир қултум май мулки Қобусдан яхши,  
Қубод пойтахти — у Тусдан яхши.  
Ошиқлар саҳар пайт чеккан ҳар бир оҳ  
Зоҳиддаги сохта товушдан яхши.

**106**

Қўлимизда бўлса оқ буғдой иони,  
Бир кося шаробу қўйнинг бир сони.  
Дилбар билан майли вайронадамиз,  
Бу айшин тополмас жаҳон султони.

**107**

Е раб, сен Каримсен, карими карам,  
Нечун осийларга берк боги Эрам.  
Сигинсам, кечирсанг — бу карам эмас,  
Гуноҳим кечирсанг — карамдир, карам.

**108**

Кўп сусткашлик қилмай ўтказ намозинг,  
Барча билан боҳам кўр кўпу озинг.  
Қасд қилма бирорнинг молу жонига,  
У дунё мен кафил, бер маю созинг.

**109**

Бу куи баҳтиңг боги гулга тўкиндир,  
Қўлинг нечун майсиз, юрагинг тиндир.  
Май ичгил, замона алдамчи бир ёв,  
Бундай кунни топмоқ жуда қийиндир.

**110**

Бир куни тушимда қари билимдон  
Деди: уйқу билан баҳт кулмас, нодон.  
Эрта кун ажалга қўшоқ бўламиз,  
Ичиб қол, тупроқда ухларсан ўбдан.

111

Кулол дўконига кирдим, кўзагар —  
Лой ишлар, кўрсатиб ажойиб ҳунар.  
Ҳеч ким кўрмагани мен кўриб қолдим,  
Ота — бобом лойин қўлида эзар.

112

Биз бир экин-тикин, қазодир деҳқон,  
Фам чекмоқ беҳуда, фойдасиз фигон,  
Қадаҳни тўлдириб, тезроқ қўлга ол,  
Бўлар иш бўлибди, ичай беармон,

113

Бир жом шароб арзир юз дилу динга,  
Бир қултум май арзир давлати Чинга.  
Дунёда бодадан яхши ёқут йўқ,  
Аччиғи арзийди жондай ширинга.

114

Тириклидан нима ғаминг бор, э ёр,  
Беҳуда фикрдан дил-жонда озор.  
Қувноқ яшагилу умринг шод ўтказ,  
Тақдир қўлингдамас, нима чораңг бор?!

115

Олам тузоғидан озод эмасмиз,  
Бир нафас олмоқдан ҳеч шод эмасмиз,  
Ҳаётга кўп шогирд бўлдигу ҳануз —  
Дунёнинг ишига устод эмасмиз.

116

Кўнглим бўлгач намоз-рўзага мойил,  
Дедим буткул мурод бўлғуси ҳосил.  
Бир ел билан, афсус, синди таҳорат,  
Рўзамни бир қултум май қилди ботил.

117

Бозорда бир кулол кўрсатиб хунар,  
Бир бўлак хом лойни телиб пиштар,  
Лой инграб айтади: Ҳой, секироқ теп,  
Мен ҳам кулол эдим сендек, биродар.

118

Тирик юролмаймац шаробсиз бир дам,  
Тан юкини майсиз тортолмайман ҳам.  
Садқаси кетайин шундай дамниким,  
Соқи май узатса, ололмай қолсам.

**119**

Ешлиқда биз шогирд, ўзгалар устод,  
Сўнгра устод бўлиб, дилни этдик шод.  
Охир қаерга етишдик десанг,  
Тупроқдан чиқибоқ, бўлибмиз барбод.

**120**

Дўсту яқинларим бир-бир кетдилар,  
Ажалдан тупроққа кириб битдилар.  
Умр мажлисизда ичдик бир қури,  
Аввалроқ маст бўлиб, бари йитдилар.

**121**

Бу замон ақлдан фойда йўқ зинҳор,  
Ақлсиз кишига жаҳон унумдор.  
Ақлимни олгувчи нарсани келтири,  
Шунда зора замон менга бўлгай ёр.

**122**

Хайём, ичкиликдан кайф қилиб, шод бўл,  
Бир дам гўзал билан ўлтириб, шод бўл.  
Жаҳонда ҳар ишнинг поёни йўқлик,  
Йўқлигу борлиқни бир билиб, шод бўл.

### 123

Бунчалик ғам ема, ўткинчи — жаҳон,  
Бир дамлик умрингда бўл шоду хандон,  
Бошқалар кетидан келмасди навбат,  
Вафо нималигин билганда даврон.

### 124

Улким жаҳон тузди, чарх — афлок тузди,  
Кўнгилга доғ солди, ҳам чок-чок тузди.  
Жуда кўп ёқут лаб, ой юзлиларни  
Ер ичра жо қилди, бир кафт хок тузди.

### 125

Лабим қўйиб кўза лабига бир дам,  
Узун умр воситаси талабин қилсан,  
Лабин келтириди-ю, лабимга, деди:  
Мен ҳам сендек эдим, бир дам бўл ҳамдам,

—

### 126

Фалак қулогимга гапирди секин:  
Қазо ҳукмин мендан кўрасан, лекин—  
Айланишим бўлса эди қўлимда,  
Ўзимни тўхтатиб, олар эдим тин.

127

Кўрдим майхонада мўйсафид хуммор,  
Кетганлар хабарин қил дедим изҳор.  
Дедиким: Май ичтил, биздеклар бисёр,  
Кетишди, хабари келмади зинҳор.

128

Май ич, бизни фалак этмоқчи ҳалок  
Жон қасдида дилни қилмоқчи чок-чок.  
Сабза узра ўлтири, тиниқ майдан ич,  
Үт бирла қопланар тез бизнинг ҳам хок.

129

Майдан бошқасига қисқа он яхши,  
Майнин ҳам узатса шўх жонон яхши  
Еру кўқдан ортиқ бир шиёла май,  
Бўлмоқ масти, қаландар ҳам сарсон яхши.

130

Май ичиб, яхшилар қўрин қуршамоқ —  
Суфийваш жаврашдан минг бор яхшироқ.  
Агар ошиқу масти дўзахий бўлса,  
Жаннат бетин ҳеч ким кўрмасди ҳеч чоқ.

### 131

Үйлама, пулсизу ночор ичмайман,  
Расволикдан қилиб ё ор, ичмайман.  
Мен майни дилхушлик учун ичардим,  
Бу кун-чи, қалбимда сен бор ичмайман.

### 132

Эй фалак, доимо ҳунаринг бузмоқ,  
Эскидан одатинг зулм кўргузмоқ.  
Ер! Агар бағрингни ёриб кўрсалар.  
Чиқарди қанчалаб инжу ялтироқ.

### 133

Гул фасли, сув бўйи, кўжаламда гар  
Бўлса уч-тўрт улфат, ой юзли дилбар,  
Қадаҳни сипқарғил, тоңгда ичганлар —  
Масжиду черковдан қутулгандирлар.

### 134

Қўш эшик дунёда қўним йўқ андак,  
Мева йўқ, қон бўлиб ўлишдан бўлак.  
Шодмондир бир нафас яшамаганлар,  
Онадан туғмаган роҳатда бешак.

135

Биз келиб кетувчи тўгарак жаҳон,  
На боши маълуму на сўнгги аён.  
Ҳеч кимса ростини айтиб беролмас:  
Биз қайдан келдигу кетурмиз қаён.

136

Сирлар пардасига йўл йўқ ҳеч қандоқ,  
Ҳеч ким ечган эмас — бу чигал жумбоқ.  
Бизларга бирдан-бир манзилдир тупроқ,  
Май ич, бу эртаклар узундан-узоқ.

137

Бу жомни кўрганлар оффарин дейди,  
Юз марта манглайнин ўшиб ким тўйди!  
Фалак кулолининг қилмишига боқ.  
Нозик жом ясади, синдириди қўйди.

138

Ичавер, май ичган мангалик яшар,  
Дунё лаззатининг барисин ошар.  
Май деган қайғуни оловдек ўртаб,  
Оби ҳаёт каби жўш уриб, тошар.

### 139

Томчи сув дарёда йўқ бўлиб кетди,  
Ерга чанг қўнди-ю, кўмилиб кетди.  
Дунёга келишинг, кетишинг нима?  
Бир чивин туғилди ё ўлиб кетди.

### 140

Менинг қайғуларим узундан-узоқ,  
Сенинг қувончларинг чексиздир, бироқ  
Унга ҳам, бунга ҳам суюнма, чунки  
Ҳаммани бу фалак қиласр ўйинчоқ.

### 141

Ердан бирон гулни ундирилас осмон,  
То уни қилмасин тупроққа яксон.  
Тупроқ булат бўлиб кўкка ўрласа,  
Қиёмат кунгача ёгар эди қон.

### 142

Умрингдан нафас ҳам ўтса, эй инсон,  
Қўлдан чиқармагил бўлмайин шодон.  
Қандоқ ўтказурсан, шундоқ ўтар умр.  
Хушёр бўл, шундақа аслида жаҳон.

143

Фалакнинг устидан ким топди зафар,  
Ер қачон одам еб тўйибди, магар—  
Мени емади, деб кеккай кўрма,  
Шошмай тур, кўп ўтмай навбатинг келар.

144

Қийинчилик чекиб, одам ҳур бўлур,  
Садафда қамалиб, қатра дур бўлур.  
Мол кетса, бош қолур унинг ўрнига,  
Қадаҳ бўшатилса, қайтадан тўлур.

145

Бир-икки кунлиқ умр ўтади дарҳол,  
Дарёда сув каби ё чўлда шамол.  
Кетган ва келмаган ҳар икки куннинг  
Ғаний эслатиб, кўп берма малол.

146

Уриндим қўяй деб сув бетига гишт,  
Кўп безор қилди бу бутхона, куништ.  
Э Хайём, ким айтар дўзахийсан деб,  
Ким бориб кўрибди дўзаху беҳишт?

### 147

Сенга кўрсатсалар ясоғлиқ олам,  
Сен севма, севмайди ақлли одам.  
Сендеклар бирталай келди-ю кетди,  
Сени олмай туриб, олиб қол сен ҳам.

### 148

Менсиз қалам сурмиш қазову қадар,  
Мендан нечун яхши-ёмоним сўрар?  
Кечча менсиз ўтди, ўтар бутуни ҳам,  
Тонгла кун нима деб қилур жавобгар?!

### 149

Қаландар йўлидан юрмасанг бўлмас,  
Қонинг-ла юз ювиб турмасанг бўлмас.  
Бу қуруқ савдони пиширолмассан,  
Ўзликдан кечиб, оҳ урмасанг бўлмас.

### 150

Ризқингни ошиғу кам қилиб бўлмас,  
Оз-кўп деб кўнгилга ғам қилиб бўлмас.  
Бу ишлар сен-менинг қўлимиздаги  
Мум эмас-да, эзиб ҳам қилиб бўлмас.

## **151**

Овоза тарқалса: чиқди янги гул,  
 Ой юзли гўзалим, шароб келтиргил.  
 Ўйлама дўзаху, жанинату ҳурни —  
 Ҳаммаси овоза, яйраб ўлтиргил.

## **152**

Шўх йигит, ўрнингдан турғил тонг — саҳар,  
 Еқут майга тўлдир биллурин соғар.  
 Ҳар дам омонатдир, ўтиб кетар тез,  
 Сўнг қанча қидирсанг тоимассен хабар.

## **153**

Тусда бир қуш кўрдим, саҳар палласи,  
 Үнгига ётарди Қовус калласи.  
 Қуш унга қараб дер: Оҳ, афсус, афсус,  
 Қани қўнгироқлар, ногора саси.

## **154**

У ён-бу ёнимга ташлаймен назар.  
 Богларда шилдираб оққан сув — кавсар,  
 Кавсардан сўз очма, далалар жаннат,  
 Шу жаннатда ўтири, ёнингда дилбар.

**155**

Келмоқ қўлда бўлса, келмасдим бир дам,  
 Кетмоқ қўлда бўлса, кетмас эдим ҳам.  
 Жуда соз бўларди бу ғамхонага  
 Келмасам, турмасам, келиб-кетмасам.

**156**

Тўғрилик бўлсайди фалакнинг иши,  
 Ёқтирган бўларди уни ҳар киши.  
 Дунёнинг ишида бўлса адолат,  
 Бўлмасди донолар кўнглини оғриши.

**157**

Дерларки, шаъбонда май ичиб бўлмас,  
 Ражаб худо ойи, ичма бир нафас.  
 Шаъбон ражаб — худо, пайғамбар ойи,  
 Рамазон бизники, шунда ичсак бас.

**158**

Лойни муштлаб турган анати қулол —  
 Қилсайди ақл ила чуқурроқ хаёл.  
 Ҳеч қачон бунчалик тепкиламасди,  
 Ота тупроғидан ясаркан сопол.

159

Эй онгсиз, билмайсан, бу олам ҳечдир,  
Негизинг шамолдир бир тутам, ҳечдир.  
Икки йўқлик аро қолмиш борлигинг,  
Атрофинг йўқлигу ўрта ҳам ҳечдир!

160

То қайгу қўлидан ичмасдан шароб,  
Қувониб ичмадим асло майи ноб.  
Ҳеч кимнинг тузига ион ботирмайман,  
То ўз жигаримдан емайин кабоб.

161

Умр дафтаридан фол очганда дил  
Хўрсиниб сўзлади бир куйган кўнгил:  
Бахтлидир ул кимса — ой юзли ёри —  
Багрида бўлса-ю оқшоми бир йил.

162

Гул узра кўкламнинг шабнами яхши,  
Чаманда юз очган ҳамдами яхши.  
Яхшимас кечаги кундан сўз очмоқ,  
Қувнаб қол, бу куннинг ҳар дами яхши.

163

Оғриқмен, иситма имтиҳон қилур.  
Ичмасам, май менга қасди жон қилур.  
Бу ажаб ишни кўр, бетоблигимда  
Майдан бошқа нарса кўп зиён қилур.

164

Хоҳлаган ишимни хоҳламас худо,  
Қачон истагимни айлабди бажо.  
Унинг истаклари тўп-тўғри бўлса,  
Менинг истакларим барчаси хато.

165

Бадбаҳтмен, гуноҳдан ҳеч қутулмадим,  
Аммо ўтирастдек ноумид бўлмадим.  
Тонг чоғи ўларсам бош оғриғидан,  
Маю маъшуқ керак, жаннат демадим.

166

Бошга чарх кулфати тушмасдан ҳали,  
Келингиз қўр тўкиб, шароб ичгали.  
Бу фалак, дунёдан ўтар чоғимиз —  
Қўймади бир томчи сув ҳам ютгали.

167

Үру қир айландик, хўп кездик олам,  
Ишимиз ўринлаб тузалмади ҳам.  
Ноқулай замонда ўтган умримиз  
Яхши ўтмаса ҳам ўтолди кам-кам.

168

Гул юз ёр ҳеч кимга насиб этмас экан,  
То унинг дилига санчилмай тикан.  
Тароққа назар сол, ёрнинг сочига —  
Етгунча юз бўлак бағри тилинган.

169

Қувончлар йўлини тутиб ҳарқалай,  
Қирғоқда ёр ила ичсанг тоза май,  
Бор бўлдим, бордирман, то бор бўламан,  
Май ичдим, ичапман, ҳар доим ичай.

170

Ким куилар ғамидан дилни қилур қон,  
Хайём, ул одамдан уялур замон.  
Шишанг тошга тегиб синмасдан бурун,  
Шишада май ичгил, соз чалиб нолон,

171

Э дил, бу жумбоқни ҳал этолмассан,  
Донолар сўзини сен этолмассан.  
Май ичиб, шу ерда жаннат пайдо қил,  
Жаннатга етарсан, ё этолмассан.

172

Мастдим, тошга урдим кўзамни бир кун,  
Ул кўнгил тилидан чиқарди бир ун:  
«Мен ҳам сендеқ эдим, сен ҳам охири  
Бўлурсан менингдек — ранжитмоқ нечун!»

173

Юз шабнамин тўйма, ток — бир келиндаӣ  
Иркитлар қонини тўкавер, қўрқмай,  
Икки минг бемаъни қонин тўксанг ҳам,  
Тўймагил тупроққа бирор қултум май.

174

Уятдир танилсанг, чиқса яхши от  
Дунёдан ранжимоқ жуда ҳам ўёт.  
Художўй бўлдим деб kekкаймагилу,  
Узумнииг сувига тўю учиб ёт.

175

Бизга маю маъшуқ, сизга дайр ташвиш,  
Сиз жанинат аҳли-ю, бизга дўзахмиш.  
Азал гуноҳимиз нима, айтинг-чи,  
Тақдир лавҳасида шундай ёзилмиш.

176

Бошқалар бошидан иччук айланай,  
Ё янги севгини бошлайнин қалай.  
Кўзимдан дув оққан ёшим қўймагаچ,  
Ўзга ёр ҳуснига қандоқ бойланай.

177

Қани ул сирдош дўст, сир айтсам бир дам,  
Азалда қандайни бўлганди одам:  
Жафо-ю, қайғудан қорилган лойи,  
Бирйўл жаҳон кезиб, тез узди қадам.

178

Хушвақт бўл, ғуссанинг чеки йўқ бироя,  
Бу чарх юлдузларга солади қирон.  
Сенинг тупроғингдан ясалгай риштлар,  
Бўлар ўзгаларга манзилу макон.

179

Нокасдан сир беркит, тилингни боғла,  
Аблаҳдан яширин бўлмоқни чоғла,  
Кишилар жонига ўз қилмишинг кўр,  
Сен ҳам шунга кўз тут, шуни сўроғла.

180

Эски, янги майга биз-ку харидор,  
Оlamни бир донга сотишга тайёр.  
Мен ўлиб кетарда «Қайға!» деб сўрма,  
Май беру хоҳлаган жойингга юбор.

181

Жанда тўнни хумнинг оғзига ёпқум,  
Харобат гардига қилдик таяммум.  
Майхона хокидан топармиз ҳаёт,  
Чунки ҳаётимиз шунда бўлди гум.

182

Жаҳон сири бўлсин дил дафтарида  
Очсанг бошга бало эл назарида,  
Дилдаги ҳар гапни айтиб бўлмайди.  
Сен бу нодонлардан турғил нарида.

183

Ариқ лабидаги ҳар гиёҳ, кўкат —  
Малакдай гўзалнинг юзидағи хат.  
Бу сабза лоладек юзлар тупроғи,  
Сабзага авайлаб оёқ қўй фоят.

184

Ҳой, кулол, қулоқ сол, гар бўлсанг ҳушёр,  
Қачонгача қилғуиг тупроғимиз хор!  
Фаридун бармоғин, Қайхусрав кафтин  
Чархингга қўйибсан, на андишанг бор?!

185

Қайдаки гулзордир, шан лолазордир,  
Ү ерда шаҳриёр — шоҳ қони бордир.  
Қайдаки бинафша унади ердан  
Бир гўзал холи эди, энди ғубордир.

186

Кимга маълум бўлса жаҳоннинг сири,  
Қувончу ғам фарқсиз биридан-бири.  
Чунки ўтмай қолмас яхши ҳам ёмон  
Хоҳ бари дард бўлсин, хоҳ дармон бари.

### 187

Кошки тинч жой топиб, кетиб бўлсайди.  
Ё бу узоқ йўлни ўтиб бўлсайди.  
Юз минг йилдан кейин орзу-умидлар  
Тупроқдан кўкатдек униб кулсайди.

### 188

Соқий, дилим тўлиб-тошмоқчи бўлса,  
Ү — денгиз, тошмайди қанчалар тўлса.  
Сўфий дили лим-лим жаҳлга тўла  
Бошга чиқар қултум май юта қолса.

### 189

Эй тун-кун дунёга кўз тиккан киши,  
Ақлингни жўймасин дунё ташвиши.  
Ахир, эсингни йиг, ҳушёроқ бир боқ,  
Недир бошқаларга унинг қилмиши.

### 190

Бу кун келар экан қўлингдан, зинҳор,  
Азизлар хотирин шод эт, э дилдор.  
Ҳуснинг салтанати турмас абадий,  
Тўсатдан қўлингдан кетиши ҳам бор.

191

Танаңгда бор экан томир, суюк, пай,  
Яшайвер тақдирнинг уйидан чиқмай.  
Ёв Рустам бўлса ҳам бўйнингни эгма,  
Миннат чекма дўстинг бўлса Ҳотам Тай.

192

Қанчалар арз қилсам мен нодонликдан,  
Дил шунча танг бўлур нотавонликдан.  
Бундан сўнг бойлайман белимга зуниор,  
Уалиб гуноҳу мусулмонлиқдан.

193

Дил — унинг дардига тўлса яхшидир.  
Бош — йўлин тупроги бўлса яхшидир,  
Ғам тигин дўст отса, унга ранжима,  
Ҳар нарса дўстингдан келса яхшидир.

194

Дейдилар: Шаробни бундан камроқ ич,  
Узринг не, улфатинг — ичку эрта-кеч.  
Узрим ёр юзи-ю, саҳар бодаси,  
Инсоф қил, бундан чўнг узр борму ҳеч.

**195**

Дейдилар, ким қилса тоат-ибодат,  
Қандай ўлса, шундай уйгонур албат.  
Доимо маю ёр билан биргамен  
Мен шундоқ тирилгум бўлса қиёмат.

**196**

Тур, э дил, чанг чалиб базм қурайлик,  
Ичиб, ёмонликка номни бурайлик.  
Сотиб жойнамозни пиёла майга,  
Риё шишаснин тошга урайлик.

**197**

Ишқингдан йўқ менга ору маломат,  
Ишқдан бехабарга қилмам ишорат,  
Бу ишқ шаробидир мардларга дори,  
Номардларга насиб бўлмас бу роҳат.

**198**

Жаҳон ишин алвон-алвон кўрамен,  
Оламни тез ўтар бир он кўрамен.  
Худо ҳаққи, қайга назар ташламай,  
Шунда бахсизлигим аён кўрамен.

199

Кўплар донишманд деб билдилар ўзни,  
Худонинг зотидан очдилар сўзни.  
Ҳеч бири билолмай азал сирларин,  
Алжираб-валжираб юмдилар кўзни.

200

Афсуски, бекордан-бекор сўлдик биз,  
Фалакнинг дастидан кукун бўлдик биз.  
Кўз очиб юмгунча кўрган аламдан  
Тилакка етолмай, охир ўлдик биз.

201

Кўп ёмон фалакнинг феъл-афъоли, бил,  
Дўстлардан жаҳонни бўшу холи бил.  
Қўлингдан келганча ўзинг билан бўл,  
Кечадан, тонгладан шу дам олий, бил.

202

Мугона бодадан маст бўлсам бордур.  
Ошиқу ринд бутпараст бўлсам бордур.  
Ҳар ким мени ҳар хил гумон қиласди,  
Қандайлигим фақат менга ошкордур.

### 203

Соқий, гулу кўкат ҳозир кўп қувноқ,  
Билки, бир ҳафтада у бўлур тупроқ.  
Май ич, гул тер, кўзни юмиб очгунча  
Гул ерга тўкилур, қовжирап ўтлоқ.

### 204

Соқий, ёнда бўлса ёқут лаб санам,  
Қадаҳингда Ҳизр суви бўлса ҳам,  
Зухро-мутриб, Исо бўлса-да ҳамдам,  
Шодлик бўлмас, хотир бўлмас эса жам.

### 205

• Келолмагач қайтиб ушбу оламга,  
Кўрқамен етмасмиз ёру ҳамдамга.  
Бу дамни ғанимат ҳисоб этайлик,  
Балки етолмасмиз ҳатто шу дамга.

### 206

Бўлмагач ҳақиқат қўлингда аёи,  
Ўтмассен бутун умр кўнгилда гумон,  
Яхшиси май жомини қўлдан қўймайин,  
На маству на ҳушёр бўлайлик шодон.

207

Осмонга чиқ, қаро ер бўлсин жаҳон,  
Май ич, гўзалларга бўлиб гиргиттон,  
Нима керак ғазаб ёки ёлвориш,  
Кетгандан келмади ҳеч қим, ҳеч қачон.

208

Ўз эркингда эмас, ахир, эрта кун.  
Эртангни кўп ўйлаб бўлма жигархун.  
Бу дамни бекорга кетказма асло,  
Билиб қўй, дунёга бўлмайсен устун.

209

Офтоб тонг камандин туширди томга,  
Кундуз шоҳи муҳра солмишдур жомга,  
Май ич, ишқ индоси саҳар пайтида  
«Ишрабу... овозин ёйди айёмга.

210

Токай ҳийлагар умр солар тузоққа,  
Токай май лойқасин тұтар дудоққа.  
Ҳийласи дастидан қолтан умримни  
Бир қултум май каби сочай тупроққа.

## 211

Бу қабрдагилар бўлмишлар тупроқ,  
Зарра-зарра бўлиб ётишар тарқоқ.  
Оҳ, бу қандай шароб, уни ичганлар  
Қиёматга қадар эс-ҳушдан авлоқ.

## 212

Қайғумдек узоқ умр кўрсин у ғазөл,  
Букун яна лутфдан кўрсатиб жамол,  
Кўзимга бир нигоҳ ташлади кетди,  
Яъни, «Яхшиликни қил, дарёга сол».

## 213

Кулол дўконига ташладим назар,  
Икки мингча кўза жим суҳбат қуарар:  
— Қайсимиз сотувчи, — деди бир кўза, —  
Қайсимиз оловчи, қани кўзагар?

## 214

Сотардик хон тахти, тёжи Кай бўлса,  
Салла, чопонни ҳам, агар най бўлса,  
Фирибнинг лашкари бўлган тасбеҳни  
Бирдан сотар эдик қултум май бўлса.

**215**

Бор-йўқнинг зоҳири — юзини билдим,  
Баланд-паст илдизи — изини билдим,  
Мансаб деб мастиликнинг ўзин билмасам,  
Билимим ҳайф кетсин, ўзини билдим.

**216**

Кафтида лаълин май, ёнида санам,  
Чаманда ўтирса баҳт бўлиб ҳамдам.  
Май ичиб фалақдан ҳеч емаса ғам,  
Ишрат майин кайфин сургай шул одам.

**217**

Биласанми савсан ҳам сарв тақдирин  
Оғизларда достон бўлганлик сирин?  
Бириси юз тили билан жим турар,  
Бириси юз қўлдан узатмас бирин.

**218**

Маст қўлига тушса пиёла, асло  
Уни синдиromoқни қўрмайди раво.  
Шунча нозанинлар қўл, бош чаногин  
Ким синдиради, ким берганди оро!

**219**

Улар жойинг ҳо Балх, хоҳи Нишопур —  
 Аччиқми, чучукми ўтар бу умр.  
 Май ич, ой осмонда биздан кейин ҳам  
 Неча марта шом еб, неча бор тўлур.

**220**

Токай бутхона-ю масжиддан дейсан,  
 Теккай жаҳаннаму беҳиштдан дейсан?  
 Тақдир лавҳасин кўр, қалам устоди —  
 Бўлар ишнинг барин ўшанга чеккан.

**221**

Ўзингга маълумдир, э даҳр ситаминг,  
 Ситам чодирида ўтар ҳар дамнинг.  
 Ёмонга неъмату яхшига кулфат,  
 Ёвмисен ё эшак? Бу не аламинг?!

**222**

Бу кося ясалмиш гўзал-ярқироқ,  
 Чил-чил қилиб йўлга ташланмиш, бироқ.  
 Зинҳор уни босиб хор айламагил,  
 Бу кося аслида чаноқ, бомш чаноқ!

**223**

Ҳайём, гуноҳим деб мотам нечун, хўш?  
 Фойдасиз, кўпми-оз бу ғам нечун, хўш?  
 Гуноҳни кечишига қарами бор-ку,  
 Ҳеч гуноҳ бўлмаса, қарам нечун, хўш?

**224**

Ажал бош эгдирса, бўлмаса чора,  
 Дастидан тану дил бўлса юз пора,  
 Тупроғимдан фақат кўза ясангиз,  
 Майнинг бўйи тегиб, тирилсам зора.

**225**

Фалак, кўнглим доим ғамнок қилурсан,  
 Қувончим кўйлагин чок-чок қилурсан,  
 Менга эслан елдан оташ уфуриб,  
 Сув ичсам оғзимда тупроқ қилурсан!

**226**

Мол-дунё ҳасрати қилмасин афгор,  
 Мангу яшар киши қани, қайда бор?  
 Бир неча нафасинг тандада амонат,  
 Амонатга амонат бўлмоқлик даркор.

**227**

Эй дил, бил, ҳар нима тансиқ жаҳонда,  
Шодлик боғин кўкат безар ҳар ёнда.  
Кечқурун кўкатга шабнам сингари  
Бир қўндингу учиб кетдинг аzonда.

**228**

Токай рангу бўйга асир бўлурсен.  
Яхши-ёмонни, деб, дилгир бўлурсен.  
Хоҳ замзам сувнио хоҳ оби ҳаёт,  
Охир ерга кириб, тақир бўлурсен.

**229**

Эрта тонг лолага шабнамки тегар,  
Чаманда бинафша бўйнини эгар.  
Рост айтсам ғунчадан жуда розимен,  
Чунки у кўтармас на этак, на бар.

**230**

Қариликдан бошда не чоғлиқ бало,  
Ёноғим гулнори — ҳозир қаҳрабо.  
Вужудим томи-ю тўртта устуни,  
Бузилган, нураган, хароб, бедаво.

**231**

Ҳаёт бўйсунмагач бизнинг тилакка,  
Хаёлу ғайратинг чиқар пучакка.  
Эрта-кеч ҳасратин чекамиз пайваст  
Кеч келдик, тез етди вақт ҳам кетмакка.

**232**

Кўзамини синдириб, иргитдинг, тангри,  
Хуррамлик эшигин беркитдинг, тангри.  
Тупроққа тўқдингку гулгун майимни,  
Билмадим, мастмисен, на этдинг, тангри.

**233**

Ахир, бу оламда бегуноҳ ким бор?  
Нечук яшай олди, бўлмай гуноҳкор?  
Ёмонлик қайтарсан ёмонлигимга  
Фарқимиз не бўлди, айт, парвардигор!

**234**

Аҳил бўлса олов ичра ҳам инсон,  
Аҳил кишиларга олов ҳам осон.  
Ноаҳил кишилар суҳбатидан қоч,  
Ноаҳил суҳбати ёмондан-ёмон.

**235**

Дил мулкида бўлмоқ керак хўп ҳушёр,  
Жаҳон ишида-чи, беуну бекор.  
Икки кўз, тил, қулоқ омон чоғида  
Кўз, тил ва қулоқсиз бўлмоқлик даркор.

**236**

Ақл лол бўлмаган тун йўқ, ажабо,  
Йигидан этакка дур тўлмас, аммо.  
Тўлдиролмас бошим косасин савдо,  
Тўнкарилган коса тўлмайди асло.

**237**

Менга нима десанг адсовату кин,  
Менга доим дейсан: «Имоисиз, бедин».  
Мен бунга иқрормен, лекин ҳаммаси  
Ўзингга тегади, яхши ўйлагин.

**238**

Сабзага ёш тўқди булут келибоқ,  
Жуда ҳайф қирмизи майсиз яшамоқ.  
Бизларга сайр жойи ҳозир бу ўтлок,  
Кимга сайргоҳ бўлур бизларниңг тупроқ.

**239**

Ўзинг йўлларга қўйибсан тузоқ,  
Зўр гуноҳ эмиш бу домга тушмоқ.  
Бирортасига ногоҳ иллинсак,  
Жазо бермоққа айлайсан сўроқ.

**240**

Харобада мену май, маъшуқ учов  
Усти -- бош, жону дил шаробга гаров.  
Лутф. умиди, азоб ваҳми писандмас,  
Бизга бедаҳл шамол, тупроқ, сув, олов.

**241**

Вужудимизгаки, не нақш солибсен,  
Юзлаб ажойибот биздан олибсен.  
Мен бўла олмаймен бундан яхшироқ,  
Ясашда сен ўзинг шундоқ қилибсен.

**242**

Ўзни доно билган у уч-тўрт нодон  
Эшак табиатин қилур намоён.  
Булар суҳбатида сен ҳам эшак бўл,  
Бўлмаса «кофир» деб қилишар эълон.

**243**

Таъбим — юзи гулга пайванд бўлади,  
Қўлим — жоми мулга пайванд бўлади.  
Ҳар жузвдан олайн иасибам, чунки —  
Жузвлар бари куллга пайванд бўлади.

**244**

Токай бору йўқнинг ғамини ейман,  
Токай умрим яхши ё ёмон дейман.  
Қадаҳ бер, маълуммас олган нафасим,  
Қайтиб чиқараман ё чиқармайман.

**245**

Ҳушёр бўл, ёғдирап бало бу жаҳон,  
Хотиржам ўтирма, наштар бу даврон.  
Оғзингга ширинлик согланида ҳам  
Зинҳор юта кўрма, оғуси пинҳон.

**246**

Эй оллоҳ, оч менга ризқинг эшигни,  
Махлуқ миннатисиз ризқимни бергин,  
Соф бодадан мени шундоқ маст қилки,  
Хабарсиз ўтказай бошим оғригин.

247

Эрта тонг нурини сочганда офтоб,  
Қўлингда тўла жом бўлмоғи савоб.  
Ҳақиқат аччиқдир, деган гап бор-ку,  
Шу далил билан ҳақ экан майи ноб.

248

Дилингда бўлмасин қайғудан иишон,  
Ҳуррамлик китёбин ўқигин ҳамон.  
Май ичиб, орзуга эришмоқ керак,  
Маълум-ку беш кунлик, ахир, бу замон.

249

Саҳар садо берди бизнинг майхона,  
Ки, э майхонамиз ринди — девона,  
Турғил паймонани тўлдир шаробга,  
Ҳали тўлмай туриб бизнинг паймона.

250

Бир сўнгакка сордек қаноат қилғон,  
Афзалдур нокасга бўлгандан меҳмон.  
Нокаснинг шиннилик нонидан яхши  
Ўзинг тошиб еган бурда арна нон.

**251**

Бу борса келмас йўл — бу узоқ сафар,  
Қани ким қайтибди, сўрасак хабар.  
Асрору илтижо айрилишида  
Ҳеч нарса қолдирма, қайтмайсан дигар.

**252**

Холиқ — кечирувчи, раҳмли Раҳмон,  
Исёну гуноҳдан бўлмагил гирён.  
Бугун масти хароб уйқуга кирсанг,  
Эрта афв этилур чирик устухон.

**253**

Ҳар сирдан огоҳсен, эй дўстим, сен ҳам,  
На учун беҳуда чекасен алам.  
Ихтиёринг билан юришмас ҳеч иш,  
Хурсанд бўл, тириксен, сеники бу дам.

**254**

Бир кўза келтирғил, бўлсин безарар,  
Ўзинг ич, менга ҳам узат баробар.  
Даврон ўз изидан айланиб, охир —  
Тупроғимиз кўза қилур кўзагар.

**255**

Қиши ўтиб, келади баҳор садоси,  
Етар умр варагин ҳам интиҳоси.  
Ғам ема, май ичгил, ҳаким дебдиким,  
Жаҳон ғами заҳар, шароб давоси.

**256**

Кўзагардан кўза олгандим бир куи,  
Бир сўз деб чиқарди кўза сирли ун:  
«Шоҳ эдим қўлимда олтин жом эди,  
Хумор бошли кўза бўлибмен бугун.»

**257**

Эрталик пайтида, э бахтли жонон,  
Май келтир, тарона созлагил чандон  
Юз минг Жамшид, Кайни тупроқса тикди —  
Бу фалак ёз кетиб, қиши келар замон.

**258**

Бир доно коми-ла чарх айланмайдир,  
Сонини саккиз де, етти барибир.  
Ўлгач-ку қолмайди орзунг, танаангни  
Гўрда чумоли ер, ё қирда қашқир,

**259**

Соқи, дилим хароб ўлник жондан ҳам,  
Ўлник ер остида ётар хотиржам.  
Қон ёшим этакни шундай юварки,  
Этагим кўзимдан ифлосроқ ва нам.

**260**

Букун менинг қувноқ ёшлик замоним,  
Ичамен ушалур орзу-армоним  
Айб қилмангиз, аччиқ бўлса-да, шароб,  
Аччиқдир, чунки у ҳаётим, жоним.

**261**

Бу қулфатхонада ҳосили инсон —  
Ғуссадан бўлакмас чиққунича жон.  
Хуррамдур ким тезроқ кетди жаҳондан,  
Осудадур кимки келмаса бир он.

**262**

Эй кўз, кўр бўлмасанг гўрдан бўл огоҳ,  
Фитна тўла олам, ҳар ён қайғу-оҳ.  
Чумоли оғзида ойдек ёноқлар,  
Ер қўйнида султон, сардор, подшоҳ.

263

Хуррамлик асоси, кони алам биз,  
Ситам асли, адл мояси ҳам биз.  
Пастмизу баландмиз, етукмиз, кам биз,  
Занг босган оина ҳам жоми Жам биз.

264

У лаълким, идиши содани келтир,  
Ул маҳрами ҳар озодани келтир.  
Бу тупроқ оламнинг сўнг натижаси —  
Шамолдур, биласен, бодани келтир.

265

Э донишманд кекса, тургил эртароқ,  
Тупроқ элаётган болага бир боқ —  
Ва унга дегилки: «Эла секинроқ,  
Кай боши, Парвизнинг қўзи бу тупроқ».

266

Мисоли бир олтин кўза бу дунё  
Суви гоҳо ширин, аччиқдир гоҳо.  
Шунча умрим бор, деб керилма ясло.  
Эгарлоқдир ажал оти доимо.

267

Масжиду Ҷутхона, Каъбада ё-ху,  
Жаниатдан умиду, дўзахдан қўрқув.  
Фақат дунё сирин англаган қалдан  
Абадий қувилмиш бу ташвиш, қайфу.

268

Қўлни қўлга бериб бўлмасак ҳамдам,  
Шодлик оёғидан тешки емас ғам.  
Тонг чоғида туриб, саҳарлик май сун,  
Жуда кўп тонг отар биздан кейин ҳам.

269

Дўстлар иноқликни қилсангиз одат,  
Тез-тез дийдор кўриб, ўзни айланг шод.  
Соқи тоза майни сузганда айланг —  
Мен бечорани ҳам дуо бирла ёд!

270

Соқи, юзинг — жоми Жамшиддан яхши,  
Иўлингда ўлмоқ — умри жовиддан яхши,  
Қадаминг чангидан кўзларим равшан,  
Ҳар зарраси юз минг хуршиддан яхши.

271

Токай қош чимирттар дунё ташвиши,  
Муродга етказмас кўнгил гиши-гиши.  
Сен-менинг ишимиз эркимиздамас,  
Қазога кўникиш — донолар иши.

272

Қазо чавгонида контокдек нуқул  
Чапу ўнг юмала, дема: иомаъқул,  
Сени юмалашга солган ким бўлса,  
У билгай, у билгай, у билгай, ҳа, ул!

273

Мен осий бандангман ризойинг қани,  
Дилим қоп-коронги, зиёйинг қани?  
Итоатим учун жаннатни берсанг,  
Бу менинг ҳаққим-ку, атойинг қани?!

274

Олтмишдан ортиқ умр истама ҳечам,  
Маст бўлмай бир ерга ташлама қадам.  
Кўза қилишмасдан бошинг косасин,  
Кўза қуч, косани ушлагил маҳкам.

275

Кимдаки ақлдан бирон сатр бор,  
Умрин бир лаҳзасин ўтказмас бекор,  
Ё худо карамин истаб ўтади.  
Ё роҳатин кўзлаб, май ичар бисёр.

276

Сенсиз ўқигандан меҳробда намоз,  
Майхонада сенга сир айтганим соз,  
Аввал — сен, охир — сен, сенсиз бари пуч,  
Майли ўтга ташла ё айла навоз.

277

Майни тоққа берсанг, тоғ ҳам рақс этар,  
Ёмонлар ёмонлаб уни наҳс этар.  
Майдан асти тавба қилмайман, зеро,  
Май тарбия берар, шахсни шахс этар.

278

Далил топдим ақлим қайнаган онда,  
Румдами, арабда, ҳамма томонда —  
Май ҳаром десалар, ишонмайман ҳеч,  
«Майсара...» деган-ку худо қуръонда.

279

Бор-йўғингдан ақлим эмас хабардор  
Тоат-исёнимга эмассан ҳам зор.  
Гуноҳдан мастману, лутфингдан ҳушёр,  
Яъни раҳматингдан доим умидвор.

280

Соқи лабларидан ранг олмиш ёқут,  
Фами дилга қувват, жонга берар қут,  
Ишқи тўфонида ким ғарқ бўлмади,  
Гўё Нуҳ кемаси унга бир тобут.

281

Соқи, менинг ғамим овоза бўлмиш,  
Мастлигим ҳам хўп беандоза бўлмиш.  
Мўйсафиду шодмен, чунки хатингдан —  
Оқ бошим баҳору дил тоза бўлмиш.

282

Хушвақт ким бу замон озод яшади,  
Худо берганларин қўймай ошади,  
Ким ғанимат билди бир дам умрни,  
Қўлда май, озоду дилшод яшади.

283

Оламни шиёда кезиб чиққанлар,  
Икки дунё сўзин дилга тукканлар,  
Бизлардан ортиқроқ билдилармикан,  
Жаҳон сирларини бир-бир йиққанлар.

284

Ҳаётга ўзга тус бергувчи шароб —  
Келтир, қадаҳга қуй, бўлса ҳам азоб,  
Қўлга бер, оламнинг ишлари хуниб,  
Ҳар нафас умр ўтар, айлагил шитоб.

285

Беҳуда ўзингга айлама ситам,  
Улушингдан ортиқ тиламагил ҳам.  
Азалдан номингга нима ёзилса,  
Уша сенинг баҳранг, бўлмас ортиқ-кам.

286

Бу чарх ҳеч кимсага сўйламайди роз,  
Ситамидан ўлди минг Маҳмуд, Аёз,  
Ичавер! Ҳеч кимда йўқ умри боқий.  
Дунёдан кетганлар, қайтиб келмас боз.

287

Жаҳон ҳақиқати мажоздир, э дил,  
Бехудага ранжу андуҳ чекмагил.  
Қазога таслим бўл, кўп-озига кўн,  
Қазо қаламравин ўзгармас деб бил.

288

Мени ҳалок этмиш ғами ҳижронинг,  
Этагингни тутдим кетган замонинг.  
Кетдингу ғамнингдан минг кўнгил ўлди,  
Қайтдинг, яна минг жон бўлди қурбонинг.

289

Буқун биз — ошиқлар ошифта-ю маст,  
Санамлар кўйида хўп бодапараст.  
Тамом ҳалос бўлиб ўзлигимиздан,  
Нақ арши аълога бўлибмиз пайваст.

290

Май ичма дейдилар, ортар фиғонинг,  
Қиёматда дўзах бўлур маконинг.  
Бу ҳақ, аммо арзир икки жаҳонга —  
Май ичиб, ширақайф бўлган бир онинг.

**291**

Топилса икки жом майин қўлга ол,  
Ҳар қандай даврада ичгил бемалол,  
Керак эмас ахир, яратганга ҳеч  
На сендек мўйлабу, на мендек соқол.

**292**

Хушвақт бўл, келмоқда ҳайит айёми,  
Шай бўлғуси бутун қувонч анжоми.  
Сустлиқдан ой сариқ, озғин ва синиқ,  
Вақтида бу дардлар битар тамоми.

**293**

Ёшлиқ айёмида шароб авлороқ,  
Тоза май ҳам юзи моҳтоб авлороқ,  
Тушдир, харобадир бу фоний дунё,  
Бўлмоқ бунда маству хароб авлороқ.

**294**

Тўйдим қашшоқ, дилтанг ҳаётдан бутуни,  
Эй, оллоҳ, кўрсаттил қудратинг бугуни,  
Иўқни бор қиласан, йўқликдан чиқар —  
Мени ҳам, борлиғим ҳурмати учун.

295

Фойда йўқ беҳуда чекмакликдаи ғам,  
Чарх мияглаб биздекни экди, ўрди ҳам,  
Қадаҳни тўлдириб қўлимга тут тез,  
Бўлари бўлди деб, ичайин бираам.

296

Қилай десанг умринг асосин маҳкам  
Ва кўнглиниг дунёда бир бора хуррам,  
Шароб сибқармоқдан бўшама ҳечам,  
Топгайсан умрингдан лаззат дамо-дам.

297

Дунёда бор нарса, бари нақш, хаёл,  
Орифмас, кимгаки маълуммас бу ҳол.  
Бир коса май ичиб ҳушинг йиғиб ол.  
Бу нақшу хаёлдан форинг бўл дарҳол!

298

Ё раб, асири дилимга раҳмат бағишила,  
Сийнам — ғам соҳилимга раҳмат бағишила.  
Майхонага ютурган оёғим кечир,  
Қадаҳгир қўлимга раҳмат бағишила.

**299**

Замонасозларнинг сўзларидан кеч,  
Гўзаллар қўлидан шароб сўраб ич,  
Дунёга келганлар бир-бир кетдилар,  
Қайтганларин ҳеч ким кўрсатолмас ҳеч.

**300**

Бу кўзданки сув ичар мардикор,  
Бунда шоҳнинг кўзи, саркор дили бор.  
Маст рухсори, маston лаълин лабидан  
Бўлган майни хўпам сипқарар хумор.

**301**

Умидлар донаси хирмонда қолур,  
Боғу роф на санда, на манда қолур.  
Симу зар тўплама, дўстлар-ла еб-ич,  
Бўлмаса, ҳаммаси душманда қолур.

**302**

Гул барги-ла кунни тўса олмайман,  
Қисмат сирларини еча олмайман,  
Фикр денгизиздан дур тоиди ақл.  
Қўрқувдан бу дурни теша олмайман.

303

Бирор киши чиқиб ҳар замон, мана Мен, дейди,  
Молу симу зари бор чунон, мана Мен, дейди.  
Иши ривож топиб турганда, бир куни ажал —  
Пистирмадан чиқиб ногаҳон, мана Мен, дейди.

304

Оlam гардишидан ўз баҳрангни ол,  
Шодлик тахтига мин, қўлда май ҳалол,  
Бўйсунсанг-сунмасанг, худо зор эмас,  
Оlamда баҳтингни ўринлатиб қол.

305

Токай пастлар хизматин этасан бажо,  
Ҳар емишга пашшадек қилма жон фидо,  
Бир ионни икки кун е, тортма ҳеч миннат,  
Ўзга ионидан ўз дил қонинг кўп авло.

306

Утиб борар ажиб умр карвони,  
Қўлингдан чиқмасин шодлик замони,  
Соқи, эрта куннинг ғамин емагил,  
Қадаҳ сун! Ўтмасин туннинг бир они.

307

Кунларим ўтади, кечалаб тавба,  
Қўлимда пиёлам лаболаб, тавба,  
Букун гул фаслидир, тавба қаёқда,  
Гул фаслида тавбадан, ёраб, тавба.

308

Мен кетдим, чунки, бу жаҳони бедод,  
Бунда яшамоқнинг охри барбод.  
Ким қочиб қутулса ажал дастидан.  
Майли, ўша бўлсин ўлимимдан шод.

309

Қаро ер қаъридан то авжи Зуҳал  
Коннот сирларин барин қилдим ҳал.  
Кўп мушкул тутунни англадим, ечдим,  
Ечилмай қолгани биргина ажал.

310

Жаҳон хулосаси бўлган инсонлар  
Фалакнинг авжидан ўйлаган онлар.  
Зотингни билишда худди осмондек,  
Эгилгану сарсон ҳам саргардонлар.

### 311

Ул ким, гўзалларга хандон лаб бермиш,  
Дард аҳлига жигар қонин зап бермиш,  
Қисматимиз шодлик бўлмаса на ғам,  
Шодмиз, чунки ғамини минг-минглаб бермиш.

### 312

Жинсимдан бир хослик топса гар соқи,  
Ҳар навдан юз фасл қашф этар соқи.  
Май берсинг, баридан кечайнин майли,  
Ҳаддимдан чиқарсинг сарбасар соқи.

### 313

Кетибсан, қайтибсан адашиброқ яна ҳам,  
Исминг кўтарилиганди ёдимииздан, эй одам,  
Соқолинг дум бўлибди, ўсиб чиқиб ортингдан,  
Тирноқларинг қўшилиб туёқ бўлмишдир бу дам.

### 314

Ёнингда гулдан ҳам нозанин дилбар,  
Гулу майдан қўлинг узма сар-басар.  
Ажал ели билан умр кўйлаги  
Гулдайин бир йўла тўкилиб кетар.

**315**

Афвинг бор, гуноҳдан қўрқув билмайман,  
Ризқ бердинг, йўл ранжин кўзга илмайман.  
Раҳмингдан оқ юз-ла турсам маҳшарда,  
Номим қора дея ташвиш қилмайман.

**316**

Гайратнинг сарф этсанг киймоқ, ичмоққа,  
Арзиди бу ишни маъзур тутмоққа.  
Хушёр бўл қолганин барни арзимас  
Умрингни сарф этиб, ўтиб кетмоққа.

**317**

Афсус, умр беҳуда бўлмишdir барбод,  
Бўлмадик ҳаромдан бир нафас озод.  
Буюрганинг қилмай юзим қародир.  
Амрингдан ташқари ишларимдан дод!

**318**

Бир нон топиб агар есанг икки кун,  
Синиқ кўзанг бўлса сув ичмак учун,  
Ўзингдан паастларга ёлланмоқ нега,  
Ўзингдек хизматин қилмоқлик нечун?!

**319**

Қисматинг азалдан ёзганимиш худо,  
 Уни қилолмайсан кўпу кам асло.  
 Демакки, борнингдан бўлғил хотиржам,  
 Иўқин ўйлаб, куйма, қилма во вайло.

**320**

Бу замон дўстни кам орттиromoқ маъқул,  
 Аҳли замонадан узоқроқ бўлгил!  
 Суянчигинг бўлиб кўринган кимса,  
 Кўзинг очсанг душман чиқади нуқул.

**321**

Кетишдан кўрқмаймен мен бу дунёда,  
 Чуники у дунёда умрим зиёда.  
 Вақти етгач тандан омонат жонни  
 Тошибирайин, шундай бўлғач иродা.

**322**

Шод дилни этмасин ғамгин, кўз ёши,  
 Хуш вақтинг эзмасин машаққат тоши.  
 Эрта не бўлишин билмагач киши,  
 Букун бўлсин май, най, маъшуқ йўлдоши.

323

Камнинг ёнида бор гулдек жонони,  
Этагин ушласин қўлда паймони.  
Эрта гул баргидек учирив кетар,  
Умр кўйлагини ажал бўрони.

324

Пушти камар ичра бир томчи эдик,  
Шаҳват ўти билан жойдан қўзғалдик.  
Эрта елга учиб кетар хокимиз,  
Бу дамни май ичиб, ўтқаз бе ҳадик.

325

Санам ҳавоси бош чаноқда бўлсин,  
Узум суви қўлда, аёқда бўлсин.  
Менга дема, тавбанг қабул этар ҳақ,  
Тавбаси ҳам мендан узоқда бўлсин.

326

Қўлимда бўлмаса агар майи пок,  
Заҳр эрур оғзимда бўлса ҳам тарёк.  
Дунё гами заҳар, тарёки шароб,  
Шунинг учун майни сибқарай бебок.

**327**

Бахтингдан унса ҳам ҳаёт озиги,  
Абадий туюлса азал ёзиги,  
Жонга соя берса тананг чодири,  
Ишонма беланддир тўртта қозиги.

**328**

Зуҳд аҳлин риёга этдилар маҳкум,  
Тячани этдилар жонидан маҳрум.  
Бошимга хўрознинг тожиси каби,  
Арра қўйсалар-да, мен қўямен хум.

**329**

Нафсим ила жангдамен доим, не қилай?  
Шул дард-ла ўтар йил, ойим, не қилай?  
Дейлик караминг-ла авф этарсан, лекин  
Уятдан ўлурман, худойим, не қилай?

**330**

Тоат дурларини ишга тизмадим,  
Юздан гуноҳ гардин артиб тўзмадим.  
Ва лекин ҳеч бирни икки демадим,  
Шунингчун лутфингдан кўнгил узмадим.

### 331

Жаҳон ғамин ема, дўстим, беҳуда,  
Ғам емагил, жаҳон қирриқдир жуда.  
Бори ўтиб кетди, йўғи ҳали йўқ,  
Бор-йўқни ғам қилмай яша осуда.

### 332

Шуҳрат толсанг, кишилар ҳасади ёмон,  
Елғиз қолсанг, сендан қилишар гумон.  
Хизр бўлсанг ҳамки ҳеч кимни билма,  
Сени ҳам билмасин майли бирор жон.

### 333

Сўзимга қулоқ ос, эй дўсти аъло,  
Дунё ишларини ўйлама асло.  
Қаноат гўшасин айлабон макон,  
Оlam ишларини қилғил тамошо.

### 334

Тупроққа қоришмай, ёки қўнмай хок,  
Меҳмон бўлиб келмиш сенга руҳи пок,  
Эрта тонг май бирла сийлаб қол уни,  
То демасларидан: «Анъам оллоҳу масок»

335

Янги мулкдан яхши қултум эски май,  
Яша ўзгасига ҳеч парво қилмай.  
Бир қадаҳ минг авто Жамшид мулкидан,  
Хум гишти Кайхусрав подшо тожидай.

336

Эй сен, тўрт унсуру етти сайёра  
Остида саргардон, бетоб, оввора,  
Нафс ғамин чекмақдан тўхтама асло,  
Ўлгач, тирилмассан иккинчи бора.

337

Ўз истагинг билан яшайсан бир дам,  
Шод ўтказ, қилсалар ҳам сенга ситам.  
Жононлар билан бўл, тананг асоси —  
Шамолу тупроғу учқун ила нам.

338

Умрим қийноқдадир, дардим бе илож,  
Роҳат қисқа, заҳмат тоғмоқда ривож.  
Худога минг бора шукурки, бало  
Ва кулфатга мени этмади муҳтоҷ.

**339**

Сабаб саҳросида кимки саргардон,  
Ишларин унингсиз юритар яздон.  
Буқун бир баҳона ўртага ташлаб,  
Эрта бажо бўлур тақдири осмон.

**340**

Умидим шоҳида самар топсам эдим,  
Умр ипин учин агар топсам эдим,  
Токай вужуд зинданда сиқилур,  
Иўқлик сари дарича, дар топсам эдим.

**341**

Иўқлиқдан келгандир бу баҳри вужуд,  
Таҳқиқ дуррин ҳеч ким теролмас хушнуд.  
Ҳарким ҳар сўз дер ўзига монанд,  
Ҳақиқат сўзини айтмоққа ношуд.

**342**

Бирини келтирса, бошқасин олар,  
Ҳеч кимга сир очмас, пинҳона қолар.  
Қазо билан бизни айламас ошно,  
Ҳаётимиз коса, майни ул солар.

### 343

Бахтингдан ободлик шохи унса ҳам,  
Ҳаётиңг либоси бўлса-да хуррам.  
Тананг чодирига суюнма кўпам,  
Тўрттала қозиги сустдир, эй одам.

### 344

Ортимдан тупураг менга замонам,  
Чиликка чиқмоқда коримардонам.  
Жон чиқа бошлади, «Нима гап?» десам,  
Деди: «Нетай хароб бўлмоқда хонам!»

### 345

Емак-ичмакка йўқ эрди эҳтиёж,  
Сени шундай қилди, энди не илож.  
Не бермиш барини қайтиб олғуси,  
Аслингта қайтарур охир бу ривож.

### 346

Бор нарсадан қўлда қолгани шамол,  
Бор нарса йўқолур, бўлур поймол.  
Бор нарсани йўққа ҳисоб этавер,  
Йўқ нарсани бор деб этгил эҳтимол.

### **347**

Иш ўнгу терсини яратгай раззоқ,  
 Рақибинг ишининг ўнгланишин боқ.  
 Коғирларга бериб май шишасини,  
 Сенга қолдиргани ичи бўш қовоқ.

### **348**

Бегона ҳам вафо қилса, жигар менга,  
 Қариндошим жафо қилса, дигар менга,  
 Заҳар дардга даво бўлса, тарёқдир ул,  
 Асал агар ёқмас экан заҳар менга.

### **349**

Бирор дин йўлини ёритар гўё,  
 Бирор ҳақиқатдан сўз айтар доно.  
 Қўрқаменким бир кун овоза келиб,  
 Дерки, ул ҳам бул ҳам бемаъни даъво.

### **350**

Фалак иши агар бўлсаadolat,  
 Барча дилга маъқул тушар бу ҳолат.  
 Фазл аҳли хотири раңжимас эрди,  
 Гардуне гардонида бўлса ҳаловат.

351

Бунда мақомимиз эмасдир муқим,  
Майсиз кун ўтказмоқ хатодир азим.  
Токай эски, янги деб чекамиз ғам,  
Биз кетгач барибир, янгими-қадим.

352

Кўп ухлама, уйгон ичайлик шароб,  
То замон бизларга бермасидин тоб.  
Бир кун келадики бу золим фалак,  
Бир қултум сувни ҳам бермас беазоб.

353

Мени айладилар дунёда мавжуд,  
Ҳаётда топганим ҳайрат, тараддуд.  
Бу йўлни ўтдиму тушунолмадим,  
Келмагу кетмакдан не экан мақсуд?!

354

Сени етакласа ҳавасу ҳаво,  
«Мендан ҳабар ол», дер дили бенаво.  
Назар сол, ўзинг ким ва қайдан келдинг,  
Бил, қайга кетурсан, бошда не бало?

355

Тупроқда ётишар уйқу босиб, хўп,  
Ер остида ниҳон мисоли бир чўп,  
Йўқлик саҳросига боқибон кўрдим  
Унда келганилару келмаганлар кўп.

356

Гул бағрини насим тилди, тўкилди,  
Сабога ҳикоят қилди, тўкилди.  
Фалак ишига боқ, бир ҳафтада гул  
Чиқди, ғунчалади, кулди, тўкилди.

357

Қайда камол тоғдинг, жононам ўзинг,  
Ойни уялтирас тунда юлдузинг.  
Базм учун юзларин безар гўзаллар,  
Жаҳон базмин безар бир сенинг юзинг.

358

Бутун умр топгил ёр ила ором,  
Жаҳон лаззатини шимир бардавом.  
Иўқлиққа кетмақдир ишинг охири,  
Умринг лаҳза уйқу, тушдир вассалом.

359

Ринд ўлтирас замин аргумогида,  
На куфру ва на дин бор димогида.  
На ҳақ, на ҳақиқат ва на шарнат,  
Ким тенг келар унга сўлу соғида.

360

Бизни айлантирган бу чархи фалак,  
Уни фонус дея хаёл қил андак:  
Қуёш чироғи-ю олам фонуси,  
Икки ўртада биз ҳайрону ҳалак.

361

Умринг юз йил бўлсин, бешюзми, ҳазор,  
Бу қўҳна саройдан кетасен иочор.  
Охири қийматинг битта бўлади.  
Бозорда гадо бўл, тахтда шахриёр.

362

Кошки умид шохидан мева теролсам,  
Ё калавам учини тошиб беролсам.  
Бу вужуд зиндонидан йўқлиқ сорига  
Эшик очиб, қадамим дадил қўёлсам,

**363**

Эй дил, замонадан эҳсон кутмагил,  
Айланар, тўхтамас даврон, кутмагил.  
Даво истаб дардинг ошар кундан куни,  
Дардга кўнікавер, дармон кутмагил.

**364**

Кеча шароб излаб босар эдим йўл,  
Иўлда ётар ўтда қовжираган гул.  
Дедим: «Гуноҳинг не, куйдирибдурлар?»  
«Бир нафас чамандга кулдим», деди ул.

**365**

Биз мисоли қушмиз, оёқларда дом,  
Умрдан дилхаста ошуфта мудом.  
Бу эшигу томсиз оламда сарсон.  
На муродга етдик ва на топдик ком.

**366**

Бу беҳабар дил ҳам тегди -ку жонга,  
Ситамидан жоним келди фигонга.  
Оlamга барибир бору йўқлигим,  
Бас мен нима учун келдим жаҳонга.

367

Бир коса шароб-ла кўнглингни шод эт,  
На ўтмиш, на келмиш кунингни ёд эт.  
Зиндоний қилинган омонат жонни,  
Ақлнинг бандидан лаҳза озод эт.

368

Тоатми ё куфр сўзи — бир нафас.  
Шак-шубҳа, ҳақиқат кўзи — бир нафас.  
Шул дамни қувончсиз ўтказмак абас,  
Умримиз ҳосили ўзи бир нафас.

369

Энди мен нифоққа қолдирмайин йўл,  
Оппоқ сочим ила майга чўзай қўл.  
Етмишга етибди умр паймоним,  
Энди хуррамликка вақт қолмади мўл.

370

Лоладек қадаҳ тут навruz айёми,  
Лолаюз ёр ила хушdir дил коми.  
Шодлик ила май ич, фируза фалак  
Тупроқ қилур, охир, шул иш анжоми.

371

Дунёда яшайсен юз йилми, бир кун,  
Токай ризқу рўзим дея жигар хун.  
Косани қўлга ол, кулол чархида  
Тупрогингдан коса ясашдан бурун.

372

Дурда бўлса-да май бўлсин лолагун,  
Эй соқий, кўзангни оч, қуйилсан хун.  
Садоқат топмадим дўсту яқиндан,  
Кўза ичидадир содиқ дўст бул кун.

373

Бинафшада ажиб бўёқлар пайдо,  
Гул этагин йирттар шўх боди сабо.  
Кумуштан ёр ила шаробин ичиб,  
Кўзасини тошга уради доно.

374

Соқий ва шаробсиз бу жаҳон ҳечдир,  
Ҳатто ироқ қуйи, яккахон ҳечдир.  
Жаҳон аҳволига кўп назар солдик,  
Ҳосили сендиран, ер-осмон ҳечдир.

375

Учмасидан туриб номинг оламдан,  
Май ичиб дилингни софлагил ғамдан.  
Бўғинларинг банд-банд кетмайин туриб,  
Ер сочи бандин еч, чиққил аламдан.

376

Қаландар йўлини тут, дайру маъбуда,  
Ҳеч бирида бўлмас дилинг осуда.  
Кафтингда қадаҳу, қучогингда хум,  
Май ичгил бошқаси бари беҳуда

377

Қаро тун этагин тилди ой нури,  
Бундай дам ўзгадир майнинг ҳузури.  
Май ичиб хаёл қил, биздан кейин ҳам,  
Нур сочаверади осмон сухсурин.

378

Бода ичгил, мулки Маҳмуд мана шу,  
Чанг эшитгил, базми Довуд мана шу.  
Келиб кетишингдан гапирма энди,  
Умрингни шод ўтказ, мақсад мана шу.

**379**

Қуруқ билимдондан қочганинг маъқул,  
Дилбар зулфи бўлсин ёдингда нуқул.  
Фалак тўқмасидан бурун қонингни,  
Косага шароб қўй, дард давоси шул.

**380**

Кетганилар қайтмиши маҳол, эй соқий,  
Тупроқда уйқуда бе ҳол, эй соқий,  
Ҳақ гапимга қулоқ сен сол, эй соқий:  
Ҳар иеки демишлар шамол, эй соқий.

**381**

Жасорат кўрсатиб яшагил бебок,  
Бода ичтил, ул ҳам бўлсин оташнок.  
Яратилмиш әдинг бошда тупроқдан,  
Инкор этма, охир бўлажаксан хок.

**382**

Май ич, дилдан кетар қудурат, зиллат,  
Тенг кўринар етмиш иккала миллат.  
Дардингга излама шифою малҳам,  
Култум майдан арир юз туман иллат.

383

Токай замонадан бўласан маҳзун,  
Токай кўзингда нам, токай дилинг хун.  
Май ичиб, жонона била бўл хуррам,  
Бул чамбардан чиқиб кетасан бир куни.

384

Ақл саодатга интилиб ҳар гоҳ  
Сенга кунда юз бор дейдики, э воҳ,  
Шодлик билан ўтказ тириклик даминг,  
Сенсан ўргач қайта кўкармас гиёҳ.

385

Эй соқий, қадаҳ тут, умримиз андак,  
Шул ҳам шодлик ила ўтснида жиндак.  
Борига шукур қил, яшайбер хуррам,  
Истагингга қараб айланмас фалак.

386

Агар мулкинг Миср, ё Рум ёки Чин,  
Ё ҳукмингда бутун ер юзин тутгин,  
Охир бу бойликтан олар ҳиссанг, бил:  
Ун газ кафан ила икки газ замин.

387

Хум келтир, қиши фасли, букун ҳаммаёқ  
Қордан покизаю, бўлибди ошпоқ.  
Бундай кун мажлис йиғ, келтир икки уд,  
Бир удни созлагил, иккинчисин ёқ.

388

Ё оллоҳ, ул гўзал ойни яратиб,  
Сочи сунбулидан анбар таратиб,  
Унга қарамагил дея буюрсанг,  
Зулмку, дил шавқин ўзинг қўзғатиб.

389

Фусса қучогига олмасин бир дам,  
Умр иши дилга толмасин алам.  
Сув бўйида ўлтири, девор тагида,  
Тупрогингдан девор бўлмай, эй одам.

390

Букун хуррамликдан фақат ном қолмиш,  
Пухта ҳамдамлардан майи хом қолмиш,  
Хурсандчилик қўлин қадаҳдан узма,  
Чунки энди қўлда маю жом қолмиш.

391

Эй олам сарвари, дин ғамин ема,  
Қайси кун ичмаклик раводур дема.  
Ичавер якшанба, шанба, душанба,  
Сешанба, чоршанба, пайшанба, жума.

392

Рўза, рамазонда гар исчам шароб,  
Мени нодон деманг, демангиз каззоб.  
Рўза азобидан куним — қаро тун,  
Саҳарлик деб майга этибмен шитоб.

393

Бир қултум шаробнинг баҳоси жаҳон,  
Хум бошидаги ғишт баҳоси минг жон.  
Бир ҳўплам май бирла лабингни покла,  
Зоҳид оқ салласи ундан минг арzon.

394

Май бўлганда товба қилмагил асло,  
Сўз бердингми унга керакдир вафо.  
Гул ёқаси йиртиқ булбуллар нолон,  
Бундай чоқда товба бўлурми раво?

395

Ўлсам тупрограмни гум қилинг майли,  
Мардумга ибрати шум қилинг майли,  
Хокимни май билан қориб лой қилиб,  
Хум бошига ғишт ё хум қилинг майли.

396

Токай мачит дейсан, намозу рўза,  
Майхонага кириб маст бўлгил тоза.  
Хайём, май ичавер, хокинг неча бор,  
Гаҳ коса қулурлар, гаҳ хуму кўза.

397

Риндлар хизматига бел боғлаб чандон,  
Айла намоз рўза асосин вайрон.  
Умари Хайёмга қулоқ ос бир он:  
Май ич, мусиқа чол ва айла эҳсон.

398

Ўзгартириб бўлмас не битмиш қалам,  
Фақат дил хун бўлур тортаверсанг ғам,  
Бутун умр жигар қонин ютсанг ҳам,  
Умринг узайтириб бўлмас бирор дам.

399

Қўйган тузоғингта тўлиқ бу олам,  
Илиниамиз қайга ташласак қадам.  
Сенинг хукмингизку силжимас зарра,  
Нечун мен оси-ю, жойим жаҳаннам?!

400

Қолипдан тушганда лойимиз азал,  
Феълимизда бўлса ҳар нечуқ амал,  
Бўла олурмидим мен ундан афзал,  
Азалда барчаси берилмиш тугал.

401

Ул азал Сайёди қўйиб дона, дом  
Ўз овига қўйди одам дея ном.  
Оlamda не яхши-ёмонлик бўлса,  
Ўзи қилиб, тўнкар одамга мудом.

402

Ошиқ бўлсанг бўлгил шайдо-ю мастан,  
Девона, шурийда, расвойи жаҳон.  
Хушёрлиқда ташвиш ҳамма нарса ҳам,  
Маст бўлгач тўпиқдан келмайди туфон.

### 403

Фақат илм билан баландмас одам,  
Аҳду вафо билан баланд-паст одам.  
Сўзи билан иши бир бўлса агар  
Ҳар нарсадан баланд, муқаддас одам.

### 404

Муҳаққиқ наздида хуш, бад сурат бир.  
Ошиқ манзилида дўзах, жанинат бир.  
Бедиллар либоси атласми, палос,  
Ошиқлар ёстиғи пар, ғиш, кўкат бир.

### 405

Бу бепоён осмон ҳолидан осон  
Хабар топди фақат икки тур инсон:  
Ё яхши-ёмондан хабардор олим,  
Ё ўзин билмас, маст, ақли паришон.

### 406

Бойликдан кўпаймас ақл ё ҳунар,  
Аммо пул бўлмаса хун бўлур жигар.  
Сероқча атр гул яшинар қуёшда,  
Бинафша сояда бош эгиб турар.

407

Май ичса гадо ҳам султон бўлади,  
Тулки ичса, шери гаррон бўлади.  
Ёш ичса, кексалик шарафин қучар,  
Кекса ичса ёшу чаққон бўлади.

408

Олам сардафтари ишқнинг имлоси,  
Ёшлик қасидасин жилва зиёси.  
Эй ишқ оламидан хабарсиз, билғил,  
Ишқ эмасми асли ҳаёт маъниси.

409

Букун булбул ўқир достону достон,  
Майнин қўлдан қўйма маstonу маston.  
Турив гулзорга чиқ, уч-тўрт кун бўлсни  
Хуррамлик манзилинг бўстону бўстон.

410

Азалдан ёзилган әмиш пешонам,  
Не бор экан унда жаннат, жаҳаннам?  
Устод менга деди: қазову қалам,  
Жаннат, дўзах бари сенда жамулжам..

**411**

Менинг қисматимга маю мастилик ёр,  
Шундан мени барча қилур гуноқкор.  
Барча гуноҳдан ҳам май ҳиди келса,  
Жаҳонда топилмас эди бир ҳушёр.

**412**

Кекса бошим тушди ишқинг домига,  
Иўқса ёпишмасдим мен май жомига.  
Эгнимга сабрдан кийгандим либос,  
Интилди дош бермай ишқ айёмига.

**413**

Иўқ дема, қадаҳ тут, эй қаро кўзим,  
Бул кеч ёқут лабинг менинг ризқ рўзим.  
Юзинг яноғидек май қўй қадаҳга,  
Товбамда зулфингдек чигал ҳар сўзим.

**414**

Май истаб қолди бу дили танг, келтир,  
Шароб бўлсин мушкбў ҳам гулранг, келтир.  
Гар ғамдан қутулмоқ истаги бўлса,  
Ёқут шароб келтир, ипак чанг келтир.

**415**

Шароб — бу ошиқлар дил алангаси,  
Маъшуқа яноғи гулин нафаси.  
Рамазон келди, биз ичолмай юрдик,  
Шаввол кела қолса — дил арзандаси.

**416**

Ҳақиқат ниҳолин ўстирмас гардун,  
Хоҳи бефарқ бўлгил, хоҳи кўп урун,  
Фалак айланниши ўзгармас жиндек,  
Бугунни кеча бил, эртани бугун.

**417**

Бизлар ичамизки, майхона обод,  
Бизлар келиб майнин этамиз барбод.  
Биз гуноҳ қилмасак раҳмат қаёқда,  
Раҳмати бўлмаса қолмас эътиқод.

**418**

Эй шоҳ, фалак сени қилди шаҳриёр,  
Тагингда аргумоқ, шоҳона от бор.  
Ногоҳ босмасин деб заррин туёғи,  
Ерии кумуш қилди, ул ёғдириб қор.

419

Симобдек булутдан ёғди настаран,  
Бундан яшиаб кетди қир, лола, чаман.  
Лоладек қадаҳга гулгун шароб қуй,  
Бинафша ранг булат тўкар ёсуман.

420

Кимсани ранжитма, ранжитма ҳайҳот,  
Ғазабинг биронга сочмагил, эй зот.  
Ўзинг ранж чеку ҳеч кимни ранжитма,  
Роҳат десанг агар ўзинг ғамга бот.

421

Оғирлик қилганда дилемга қайғу,  
Ғам-алам солганда дилемга оғу,  
Хайр суви — шароб ювар дил ғамин,  
Нечун уни дерлар шарр об — разил сув.

422

Муҳаббат ўтида ёнмаса кўнгил,  
Ҳолигавой, дегил, бемору заҳил.  
Муҳаббатсиз ўтган ҳар бир кунинг, бил;  
Умрингдан беҳуда кетмиш бе ҳосил.

423

Беш кунлик ҳаётда ичгил майи ноб,  
Беш кунлик умрингни ўтказгил шодоб.  
Хароб этмак эрур жаҳоннинг иши,  
Сен ҳам кечакундуз бўл маству хароб.

424

«Илоҳиёт илмин ўргат», деди дил,  
Агар ўзинг билсанг менга баён қил.  
«Алиф» деган эдим «бас» деди менга,  
«Бир ҳарф ҳам етади» ким бўлса оқил.

425

Дилимизда бўлсин доим ишқи пок,  
Охирида ажал айлагай ҳалок.  
Эй кушлиқо соқий, Фориғ ўлтирма,  
Май бер охирида хок бўлурмиз, хок!

426

Баъзилар хаёли майда, ичкуда,  
Баъзилар меҳробда, дили осуда.  
Бекор киши йўқдир, барчада ташвиш,  
Елғиз ўзи уйғоқ, барча уйқуда.

427

Бир бурчакда қотган нонга қаноат,  
Истамадим ундан ортиқ ҳашамат.  
Жону дилдан харид этдим фақирлик,  
Фақирликтан ортиқ кўрмадим давлат.

428

Май инсоф жомида латиф бир жондир,  
Тан шишаси ичра руҳи равондир.  
Ҳеч ким ҳамдамликда тенг кела олмас,  
Фақат соғар менга дўсти жонондир.

429

Май ичсам эгилиб қолади тиззам,  
Ўйласам гуноҳмас сажда-ку бул ҳам.  
Азалдан биларди буни ҳақ ўзи,  
Шаккоклик эмасми, агар ичмасам.

430

Май нодонга ҳаром, донога ҳалол,  
Ким-ла, қачон ичмак мумкин, билиб ол.  
Шул уч масалани ҳал эта олсанг,  
Демак билимдонсан, сипқор bemalol.

**431**

Кимки бу дунёга асири тамиз,  
Бору йўқ ғамида дил тангу ожиз.  
Яшамай қартайди бундай одамлар,  
Узум бўлмай, бирдан бўлдилар майиз.

**432**

Эй бодаи хушбуй, ўхшайсан гулга,  
Аммо дил гавҳарин берасан қўлга.  
Ким ичса амонлик тоғмайди сендан,  
Ақл кўзин боғлаб соласан йўлга.

**433**

Гул мавсуми келди ич бода гулранг,  
Бир ёқда най бўлсин, бир томонда чанг,  
Май ичиб, айш қилиб дилингни шод эт,  
На қилай, қум ютгил, агар ичмасанг.

**434**

Ишқ мажозий эса, офтоби бўлмас,  
Кул босган оловнинг ҳеч тоби бўлмас.  
Чин ошиқнинг эса кечак ю кундуз,  
Ою йиллар кўзда дам хоби бўлмас.

**435**

Ғуур либосини ечибон бул чоқ,  
Суратингга эмас, сийратингга боқ,  
Магурлик дилингда бўлмоги даркор,  
Увадада султон ногорасин қоқ.

**436**

Сенинг исботингга етмайди ақлим,  
Номинг такоридан бўшамас тилим.  
Зотингни мен қандай била оламен,  
Уни билур сендан ўзга яна ким?

**437**

Дединг: «Ҳақиқат не, нимадир одам?»  
Сўзласам чўзилиб кетадир қиссам,  
Ҳақ уни ундириб дарё қаъридан,  
Қаърига отади яшатмай бир дам.

**438**

Эй чарх, гардишингдан эмасман хурсанд,  
Озод эт, ярашмас менга ҳеч бул банд.  
Нодон, ноаҳлга гар карам қилсанг,  
Мен ҳам эмасмен-ку аҳли донишманд.

**439**

Бу кажрафтор осмон қилмиши нософ,  
Қилгани борми ҳеч кимса дилин чоғ?  
Дунёда кимники кўрма доғ дили,  
Фалак эса қўяр доғ устига доғ.

**440**

Поку, аҳил, оқил қишига ўртоқ —  
Бўлу ноаҳилдан қочавер йироқ.  
Доно сенга заҳар тутса ҳам ичгил,  
Қўл чўзмагил шарбат тутса ҳам аҳмоқ.

**441**

Харобаг аҳли аҳил, инсони инсон,  
Улардан бирорвга етмайди зиёни.  
Мадрасадан чиқар барча ёмоналик,  
Қўлимдан келсайди, қиласдим вайрон.

**442**

Бу олам суврати бари нақш, хаёл,  
Олим эрмас кимки тушунмас не ҳол.  
Бир жом ақиқ шароб ичиб бўл хушҳол,  
Бу нақшу хаёлдан форинг бўл дарҳол.

**443**

Яхши номла машхур бўлмоқ яхшидур,  
Дема чарҳдан раижур бўлмоқ яхшидур,  
Ток сувидан маҳмур бўлмоқ яхшидур,  
Дема зуҳддан мағрур бўлмоқ яхшидур.

**444**

Номоз, рўза дема, бўлса имконинг,  
Кимсадан аяма бир луқма ионинг.  
Кишини ранжитма, гийбатин қилма,  
Шунда сенга боқар икки жаҳонинг.

**445**

Манзилимиз экан бевафо олам,  
Тинмайин истадим камоли одам.  
Сенинг лионингдек ойни кўрмадим,  
Қаддинг мисоли сарв толмадим, санам.

**446**

Олам бари меҳнат, куиларимиз ғам,  
Фалак иши офат, айёми ситам.  
Ҳар ён назар солдик, кўп кездик олам,  
Бирор кимса йўқдир дили хотиржам.

447

Майхона шиширар кимнинг соқоли,  
Яхши-ю ёмондан у эрур ҳоли.  
Човгону коптоқдек ҳар икки жаҳон  
Тўқнашса, қарорга йўқдир мажоли.

448

Тушунсангчи, умри азиз ўтмақда,  
Кўрсангчи, у нечук ўксиз ўтмақда.  
Бир нафас ҳам айшу ишрат кўрмайин,  
Минг хайф ила умр эсиз ўтмақда.

449

Огоҳмассан олам сиридан, юрак,  
Иҳтиёринг ила айланмас фалак.  
Арзир-арзимасга ғам емак нечун,  
Бир дамлик умрингни хуш ўткиз андак.

450

Дардга чалинмиш бу дили вайронам,  
Ишқдан уйғонмади сармаст жононам.  
Ошиқлик шаробин берганлари қун  
Жигарим қони-ла тўлди паймонам.

451

Кўнглим очолмайди баҳор палласи,  
Бўлмаса май, маъшуқ, машшоқ ялласи.  
Боғ ичра май, машшоқ, маъшуқанг бўлса,  
Жанинат ҳам, кавсар ҳам, шудир хулласи.

452

Қидирар экансан хуррамлик дамин,  
Оёқ остингда кўр гурур оламин.  
Унда сен ҳам кириб менинг динимга,  
Май сибқар, емагил бу дунё ғамин.

453

Ҳикмат чодирини тиклади Хайём,  
Андуҳ қўрасида ёнди ул ноком.  
Умр ишин шарт кесди ажал қайчиси,  
Хизматига охир шул эрди инъом.

## И З О Ҳ Л А Р

Абас — беҳуда.

Адҳам — балхлик машҳур суфий Иброҳим Адҳам.

Вафот этган йили 776—783 йиллар орасида.

Аёз — Маҳмуд шоҳнинг суюкли ғуломи.

Аёқ — қадаҳ, май косаси.

Анқо — афсонавий қуш.

Анъам оллаҳу масоқ — оллоҳ кунингни баракали қилсин. Қуръондан тазмин.

Афлок — «Фалак»нинг кўплиги, осмонлар.

Ботил — бузилган, бузуқ.

Бусанд — машҳур суфий Абдусаид ибн Абилҳайр Майханаги, 967—1049 йилларда яшаган.

Валлоҳу латифун биибодиҳ — худо бандаларига лутф қилювчидир.

Газ — узунлик ўлчови. 71 см. га teng.

Гардун — фалак, осмон, тақдир.

Дар — эшик.

Дайр — бараҳман дини ибодатхонаси, бутхона, мажозан майхона.

Довуд — Яҳудий пайгамбарларидан бири, мусиқа ижодкорларидан ҳисобланади.

Дур тешмоқ — Бу ерда мажозан — сўз айтмоқ.

Душвор — қийин.

Жамшид ёки Жам — афсонавий Эрон шоҳларидан бири, гўё у етти иқлимга ҳукмронлик қилган эмиш.

Жайхун — Амударёнинг қадимий номи.

Жовид — абадий.

Жоми Жам — Жамшид жоми, афсонавий жом, гўё унда бутун жаҳон кўринаркан.

Зоҳид — ибодатга берилган шайх.

Зуннор — мусулмон мамлакатларида яшовчи христианлар мажбурий суратда белига боғлаб юрадиган чилвир.

Зуҳал — Сатурн планетаси.  
Зухд — дунёдан воз кечиб, тоат-ибодат билан шуғулланиши.  
Зуҳра — Венера планетаси. Чўлпон юлдузи.  
Ифшо — фош этилган, ошкор қилинган.  
Ишробу — ичинг (арабча), қуръондан олинган цитата.  
Қажрафтор — эгри юрувчи, ишлари эгри.  
Кайқубод — Қубод — қадимий Эрон афсонавий шоҳларидан бири.  
Калисо — христианлар ибодатхонаси.  
Ком — истак, хоҳиш.  
Куниш — ўтпарамастларнинг ибодатхонаси.  
Кулл — куллиёт.  
Майсара — араб тилида «бойлик, фаровонлик...» маъноларига эга бўлган бу сўзга Ҳайём форсча «майсара — май тоза, соф, яхши» маъноларини бериб, асл нусханинг учинчи мисрасидаги «майсара» (қўшиннинг сўл қаноти) сўзи билан сўз ўйини қилмоқда.  
Марям — Исонинг онаси. Марям овқати (Гизойи Марям) — Марям Исога ҳомила бўлгандага гўё гойибдан келиб турган озиқ-овқат эмиш.  
Махмур — маст.  
Мафҳум — фаҳмланган, тушунилган.  
Маъбуда — илоҳа, тангри.  
Маҳзун — қайгули, ғамгин, хафа.  
Маҳмуд — Газнавийлар сулоласидан, 998—1030 йилларда ҳукмронлик қилган подшо.  
Мул — май.  
Муфти — фатво берувчи, шариат ҳукмини баён этувчи.  
Муг — майфуруш.  
Ниёз — эҳтиёж.  
Ойин — расм, одат.  
Пуркор — ишчан, ишбилармон.  
Ражаб — ҳижрий йил ҳисобида еттинчи ойнинг номи.  
Рамазон — рўза ойи, ҳижрий йил ҳисобида тўққизинчи ойнинг номи. Ислом динида ражаб, шаъбон ва айниқса, рамазон ойлари муқаддас ҳисобланади.  
Расул — пайгамбар.  
Ринд — нозик табиат, бепарво, қонун-қоидани писанд этмайдиган.  
Розиқ — ризқ берувчи, худо.  
Салиб — христиан динидагилар бўйнига осиб юрадиган бут, крест.  
Софар — май қадаҳи, май косаси.  
Тарабнок — хурсанд.

Тонгла — қиёмат нун.

Тус — Хурсондаги (ҳозир Эронда) бир шаҳарнинг номи.

Уд — мусиқа асбоби номи, ёққанда хуш бўй берадиган ёғоч. Шоир бунда шу икки маънога суюниб сўз ўйини қилмоқда.

Фузун — ортиқ, зиёда.

Харобот — майхона.

Хуршид — қуёш.

Хирқа — жанда, дарвиш ва шайхларнинг махсус кийими.

Хизр — оби ҳаёт сувини ичган афсонавий пайғамбар. У доим кишиларга яхшилик қиласди.

Хизр суни — оби ҳаёт.

Чавгон — от устида юриб узун таёқ (човгон) ва копток (гўй) билан ўйналадиган ўйин.

Шарр об — разил сув — бунда шоир сўз ўйини қилмоқда, Шароб сўзини араб алифбосида Шарр об деб ўқиш ҳам мумкин.

Шаҳриёр — шоҳ, подшоҳ.

Шаъбон — барот ойи, ҳижрий йил ҳисобида саккизинчи ойнинг номи.

Шурида — паришон, ганграган.

Яздон — худо.

Ғазол — кийик.

Қазо — тасодиф.

Қадар — тақдир, ёзмиш.

Қобус — Кайковус — Қадимий Эрон афсонавий шоҳларидан бири.

## М У Н Д А Р И Ж А

Жаҳонни забт этган шеърият <i>Ш. Шомуҳамедов</i>	3
Рубоийлар	9
Изоҳлар	123

*Китобга киритилган расмлар Техрон нашридан олинди (1972 й.).*

*Рассом — Ҳусайн Бекзод.*

На узбекском языке

ОМАР ХАЙЯМ

Рубаи

Издательство ЦК Компартии Узбекистана  
Ташкент — 1981

Техн. редактор Г. Ломиворотова  
Корректор Д. Исакова

Теришга берилди 24.04.81. Босишига рухсат этилди 16.11.81.  
Формати  $84 \times 108 \frac{1}{32}$ . Гарнитура «Новая газетная».  
Юқори босма. Шартли босма листи 6,72+7 вкл.  
Нашриёт ҳисоб листи 3,75. Тиражи 200.000. Заказ № 977.  
Баҳоси 75 т.

Ўзбекистон КП Марказий Комитети нашриётининг  
Меҳнат Қизил Байроқ орденли босмахонаси  
Тошкент, «Правда Востока» кўчаси, 26-й.

## X 18

Хайём, Умар.

Рубонйлар. Ш. Шомуҳамедов тарж.; Редкол.: Жабборов Ж. Ж. ва бошқ.—2-чи тўлдирилган нашри.— Т.: Ўзбекистон КП МК нашриёти, 1981.— 128 б., 7 қўш. в.— (Шарқ классиклари меросидан.)

Сарл. олдида: ЎзССР ФА Ҳ. С. Сулаймонов номидаги қўллётзмалар ин-ти.

Хайям, Омар. Рубаи.

С (Тадж.)+И (Иран)